

## **ASO LULU, 22 SETEMA 2021**

*Na nofoia e le Fofoga Fetalai le Nofoa i le itula e 9:30 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoaofaitulafono.

Ia, e avea lenei taeao e faatalofa atu ai i le paia o le Palemene, le paia faalagia o le alofa o le Maota i le Afio o lau Afioga i le Palemia, lau Afioga i le Sui Palemia, Minisita o le Kapeneta faapea foi ia outou Afioga i Minisita Lagolago ia tainane ia le Afio o lau Afioga i le Taitai o le Itu Agai ma le mamalu o sui usufono o le Palemene. Malo le soifua manuia ma le lagi e mama.

E faatalofa atu foi Samoa i le maleifua mai i lenei taeao fou i ou tulaga faalupelupeina i le afua mai i mauga tetele seia paia le fanau iti, malo le soifua manuia malo le folau. Ia tapuai maia ma le manuia.

Ia ua o tatou mafuta foi ma Ofisa o Pulega o Matagaluga ma Faalapotopotoga Tumaoti a le Malo, ia faamalo le onosai, faamalo foi le galulue.

O le faasilasilaga a le Taitai o le Maota, ou te tapa lau Afioga i le Palemia.

### **FAAALIGA MAI LE TAITAI O LE MAOTA. TUIGA MO LE KOVITI-19.**

**Afioga Hon FIAME NAOMI MATAAFA (Palemia):** Lau Afioga i le Fofoga Fetalai, tatou folau faatasi i lou sa, i le Viiga ma le taulaga faafetai ua e siitia i lenei taeao fou, e sulaina ai le alofa tunoa o Iesu Keriso lo tatou Alii Faaola, o lo o tatou maua ai le malosi faafouina, e faaauau le tatou galuga.

Faamalo le folau, faafetai le pale i lenei Palemene ao faagasolo ia le tatou galuga i le Tala Faatatau o le Tupe aua si o tatou atunuu o tapuai mai.

I lou tulaga o le Taitaifono i le Komiti tele o Faalavelave Faafuasei, ma Faalavelave Tutupu matuia, ou te faailoa atu ai i le mamalu o lenei Palemene, aemaise le faafofoga mai o le paia o le atunuu ua atofaina aso e

lua, o le Aso Tofi ma le Aso Faraile o le vaiaso lenei e faatino ai le Tuiga tele mo le Koviti-19 mo le tatou atunuu atoa.

O lenei fuafuaga ua ae, e faavae i le agaga naunautai o le Malo e faasopolia le atunuu ma ia ausia le fuainumera o i latou ua tatau ona fai tui puipuia e 127,000. O le taimi lenei, ua ausia le 120,000 o i latou ua maea o latou tui puipui muamua, ae 52,000 i latou ua maea ia tui puipui e 2. Ae e manaomia lo tatou ausia o le 99% o i latou e fai ia latou tui puipuia, ina ia mafai ona maua ia puipuiga lautele mo le atunuu e manaomia ia po o le herd immunity. O lo o silafia e lenei Palemene, e 2 tui e faatino mo le Koviti-19, ona faatoa ausia ai lea o le puipuiga e manaomia.

Lau Afioga i le Fofoga Fetalai, na amata mai ia Aperila ina ua maua mai ia a tatou tui muamua mai i le COVAX Facility. O le fesoasoani lea mai i le Faalapotopotoga a Malo Afaatasi ma faagasolo ai loa ia le tuiga. O le lua masina talu ai, sa oo atu ai ia le aufaigaluega i aiga taitasi, e faatino ia le tuiga o le Koviti-19, peitai ua manatu le Malo. E ala ona saga matimati le galuega e ala i le faatino loa o se tuiga mo le atunuu atoa i aso e lua ua atofaina nei. O lo o silafia foi e lenei Maota sa faatino ia le tuiga mo le misela ia Tesema i le 2019.

Ua lava ia tatou tui mo le atunuu atoa, ma e faafetaia le agalelei o a tatou paaga i le faasoia fua mai o nei tui. E toe pau le galuega o lo o manaomia ona faatino o le tatou faaoga tatauina ae e le i maea le aoga o nei vailaau.

O le polokalame ua faataoto, ua maea faatulaga uma au po o teams e 150 e faatinoina ia lenei galuega tele. E i ai au ua tofia mo le motu tele i Savaii ia faapea ma Upolu nei o Manono ma Apolima.

O le a tofia uma galuega a le Malo faapea Pisinisi Tumaoti ao faagasolo ia tuiga i le Aso Tofi ma le Aso Faraile. E taitaiina e Faauluuluga ma Faalapotopotoga a le Malo ma Faalapotopotoga Tumaoti nei au ma o le a i ai ia alii ma tamaitai fomai e faatinoina le tuiga, ma le Malu o le Malo aua le puipuiga.

Lau Afioga i le Fofoga Fetalai, e i ai le faamoemoe e ausia le 30,000 pe sili atu le mamalu o le atunuu e tui i nei aso e lua. O le a galulue uma ia le aufaigaluega a le Malo, e faatino ia lenei galuega, e taimua ai le Matagaluega o le Soifua Maloloina ma le Komiti o Faalavelave Faafuasei.

O le faamoemoe maualuga, ia maua uma ia le atunuu i maota ma laoa ao faagasolo atu ia le tuiga. Ia tautuana, se fua mumu e nonoa i luma o lou maota e faailoa ai i le aufaigaluega o le a agai atu, o lo o manaomia ia le fai o le tui.

O le a faaauau pea ona tatala auaunaga togia o le soifua i aso uma mo le atunuu, po o a tatou essential services, e i ai auaunaga tau falemai, leoleo, tineimu, uafu ma malaevaalele faavaomalo, o le suavai ma le eletise. E amata le itu o le vavao mai i le ta o le 8:00 i le taeao seia oo atu i le 6:00 i le afiafi mo le Aso Tofi ma le Aso Faraile, ona toe tatala lea o auaunaga i le afiafi.

Lau Afioga i le Fofoga Fetalai, ia e avea ia lenei laolao ou te tatalo atu ai i le paia o le atunuu, i tupu ma ee, i pulega o alii ma faipule, le aufaigaluega tofofi a le Atua ma Ekalesia, Faalapotopotoga ma Pisinisi Tumaoti aemaise le loaloa o si o tatou atunuu. Ia alofagia lenei galuega, ua fuafua mo lenei vaiaso. O le upu moni, afai e lalago faatasi ia o tatou apefoe, e faatini foe mo le ae, o lenei galuega, aua le puipuiga o si o tatou atunuu mai i le Koviti-19 o le a ae manuia ia lenei faamoemoe.

E faapea foi ona tatalo atu i le paia o lenei Maota, o tatou o Taitai na tofofi mai e le atunuu e lipoiina upufai o Malo. O le tatalo, tatou taimua i lenei galuega i totonu o a tatou itumalo ma afioaga ina ia faasopolia ia lo tatou atunuu i lenei taumafaiga o le a faatino e lo tatou Malo.

Ia faamanuia le Atua i le aufaigaluega galulue, o le a faatinoina ia lenei faamoemoe. E faapea foi i le talimau mai o le atunuu i afioaga ma aiga. Tatou tau fai mulumuluafoe faatasi, e faatino ia lenei galuega taua mo le atunuu atoa. Ia manuia ia le Fonousu a le Palemene i lenei taeao foul au Afioga, faafetai mo le avanoa.

### **TULAFONO TAU FAAOFI O LE FAATATAUINA O TUPE 2021/2022 – felafolafoaiga i luga o le faitauga faalua – Aso 6**

**FOFOGA FETALAI:** E tolopo Galuega a le Fono Aoaofa Faitulafono i le po anapo o lo o sausaunoa e talifuaitau le Afioga i le Minisita o Faatoaga ma Faigafaiva i mataupu sa laga e sui usufono.

Ia o le avanoa lenei e tulai mai ai lau Afioga i le Minisita e faaauau ia lau saunoaga.

**Susuga Hon LAAULI LEUATEA POLATAIVAO FOSI (Minisita mo Faatoaga ma Faigafaiva):** Faafetai tele i lau Afioga i le Fofoga Fetalai, mo lou avanoa i le alafai mai foi i fanuga lelei ma emo le uila lalelei o manu fetutai o lenei foi taeao fou. E faafoi ai pea le Viiga ma le Faafetai i le Atua ona e matau atu o lena lava e tumau ia le la i Kipeona i le soifua manuia a lau Afioga i le Fofoga o le Fono. O lo o tumau foi ia le masina i luga o Airona, i le paia ma le mamalu o lenei Maota.

Sa o tatou tofafa ma momoe i le pogisa ua mavae atu. Sa o tatou le iloa pe tua ma ni a pe tatou te toe feala mai. Ae taofi o le alofa o le Atua ua o tatou toe feiloai ai i magafetausoifua ma magafetaufoiola i lenei foi aso manuia. E toe faatalofa atu ai i le paia ma le mamalu o le tatou Maota i lenei taeao fou, ailao afua le Atua, Viia Lou agalelei. Faatalofa i le Maota i ona tulaga faalupe, i le Failautusi o le Fono ma le Ofisa o le Fono ma le mamalu maualuga, i Ofisa Sili o Pulega o Matagaluega, Faalapotopotoga a le Malo aemaise ia le tapuaiga a Samoa. Faatalofa atu foi i le tapuai mai o si o tatou

atunuu o Samoa, o le a toe tootoo ia le vaatele i lenei aso aua le lauililiuina o le tamaoaiga.

E malolo le Fono anapo o lo o tulai mai le Afioga ia Fonotoe e toe faafesili mai lava i le mataupu lea e uiga i le tatou Export Authority. O lea sa ou faamalalama atu muamua, o le lagona lena ma le manatu na na tutupu ifo, ina ua o tatou matau ma vaai i le tatou savaliga na o tatou savavali mai ai. E leai se mea e tasi e tatou te le i faatinoina. Tatou ave a tatou fuafuaga i lea atinae ma lea atinae, ma lea atinae ma lea atinae. Ae ina ua alualu le tatou folauga tatou vaai, o le tele ia o mea e tataua ona tatou aaoina, ona o mea ua tutupu. O faamai, o afa, o tsunami, ia ma le mea lea ua tupu nei i le taeao lenei, lea na saunoa ai le Afioga i le Palemia, o le faamai tele lea ua sau ua le mafai ai ona o tatou minoi ona ua aafia le lalolagi atoa.

Ma o le fatu lena o le mafaufauga lena o le tatou Export Authority. O le Export Authority, o le faigapaaga vavalalata lea, a le Malo ma le aufaipisinisi, Private Sectors. E matua fesootai ai le Malo ma ona tagata, exporters ma le aufaifaatoaga. O lea sa ou matau na saunoa nisi o outou na o tatou o foi fai muamua sa i ai ia le tatou product market division. Na o tatou vaai uma lava i le mea sa fai i le uafu. Sa o tatou o foi ia le tatou Copra Board, sa o tatou vaai foi i lena mea na fai, fai ai ia le tatou falesuauu ma popo. Na o tatou o foi fai ia le tatou Cocoa Board, sa o tatou vaai foi i lena mea i lena taimi.

Ae o le eseese lea o le a faatavale atu i le mataupu lenei, e le na o le Malo e alu na o ia. O le faigapaaga a le Malo ma tagata Samoa uma e aafia ai le aufaipisinisi ma le aufaifaatoaga.

O le Export Authority la e le na o se mea tau i le Malo. Leai, o latou uma lava nei e faia le galuega i le taimi lenei, all the exporters. Ma e avea lenei avanoa e momoli ai le agaga faafetai tele i tupu ma tamalii ma i latou uma o lea lava e oo mai i le aso, lea e fufusu i i, o le o e faatau mai fua o faaleeleaga o le aufaifaatoaga fufulu mama, fai aiaiga, tuu i le container, tuu i le vaa, oso i le vaalele, alu e tau saili se maketi. Faafetai, ma e le lilo e le lanu galuega na sa outou faia.

O le tulai atu la o le tatou Malo i le taimi lenei, e le na o au, e le na o le Matagaluega foi lenei e aafia, e aafia uma lava le Kapeneta. O lea na saunoa mai nisi pe a pe a ave i lalo o le Matagaluega o Pisinisi ma Alamanuia, e i ai foi ma le Matagaluega a le Afioga i le Minisita. Ae o le atoaga o le mea lenei, e saofafai ai i latou o lo o latou faia le galuega o le ave o oloa i fafo. Na ou fai atu ia lau tala lea anapo o le Malo, o le a tietie ai i luga ia tagata nei. It's the wind beneath the wing. E matua ave i ai le fesoasoani atoa a le Malo, e o ai e fai mea ia, ave i ai tupe, o mea faafaigofie, o talanoaga faava o le Malo i le Malo ma talai faitotoa.

A foi na ou fai atu anapo, afai e alu ia le exporter na o ia, se e lavelavea solo atu. Se a e alu i Niu Sila o la e faalalava mai mea eseese leaga foi o la e saofafai ai isi tagatanuu i Biosecurity i o. E taofiofi e faapena le polokiki

lea e alu e... e faapena mea. A o o le saunoa o le Malo i le Malo, ia e le fai atu, Government to Government level approach, lea na ou fai atu ai. E matua matala faitotoa, ia ona savalivali atu lava lea o le exporter ia i totonu ua saoloto. A i ai ni aiaiga o lo o i ai toatuga ma faigata, talanoa le Malo i le Malo, matala.

E fiu le exporter e toatasi e tau saili, e fiu o lea ua ou fai atu, fiu. Ae o le auga lena o le faamoemoe lenei, e matala ai. O Samoa ma le lalolagi, e leai se vaipanoa o lo o nofo ai ma alaala ai se Samoa. E ma we are the biggest bind power i tatou lava produce talo, fai, ufi, koko, popo, manioka o a mea eseese, o tatou tagata o tagata taumamafa, o la e soo ai le lalolagi, Amerika, so o se setete o Amerika o la e i ai Samoa, Hawaii, Ausetalia po o fea se Setete o Ausetalia, o la e toatele ai le tatou atunuu. Niu Sila, o la e i ai uma ia o tatou tagata. Ma o latou la nei, o latou nei e o mai e faatau mea ia.

Ae o le a le tiute a le Malo e fai, e taulamua e faamatala ma talosaga i o tatou tagata, Samoa i atunuu i fafo, omai e faatau mea ia leaga foi o tatou e ana mea ia. O le tamaoiga lena o Samoa e sau lau tupe lena, foi mai lava sau lava sau lava sau lava tau i Falealili. Pe alu foi tau i Falealupo le aufaifaatoaga o lea e faatalitali atu.

O le talosaga foi lena o lea ua ou talosaga i le Kapeneta ina ia matua mau le fesootaiga o tatou Ofisa lea e i fafo, Konesula, Amepasa. O ai uma ia tatou Ofisa lea e i fafo o le latou tiute o le saili o maketi mo i tatou, ma faaaauai ia le latou galuega o lo o fai i le taimi lenei. Sue mai le tau o le talo i lea masina, Ausetalia, Niu Sila, Amerika saili mai le mea lea po o le a le mea lea e i ai le mea lea, ina ia aua aua lava ne i o tatou toe o i pogisa.

A lelei le tau e faatau ai le talo i Niu Sila po o Ausetalia ma Amerika lelei le tau e faatau ai e le exporter le talo a le faifaatoaga, ona a lea? Tatou talanoa loa lea i le mea lea e tatou te mananao ai. Aua ne i toe i ai se pusa talo e pau i le \$70, o le tali lena. Ma o le faamoemoega lena ina ia aua, aua ne i toe i ai se mea e tasi e faaletonu ae tutu ai lava le Malo. Leaga e i ai isi atunuu e tutupu ai faafitauli e leai lava se atinae e leai se faafitauli. E o atu isi exporters, e o atu lea e manao i le tupe vave. E na ona alu atu lava faatau tiai i le maketi ona a lea? Ona lavevea uma ai lea i le laina o isi ia e taumafai atu ia le galuega. O i ina le isi toalia lea e tatou te i ai leaga ua toe o atu lava ia tatou exporter toe finau latou.

A o le galuega lea e fai atu, ia gagana i le gagana e tasi, ia leo i le leo e tasi. A faapea fai atu le tatou Malo o le tau lea ia outou o i Niu Sila po o Ausetalia po o Amerika o le tau lea e tou te faatau ai ia tatou talo, aua ne i tou o i le talo lea. O le tau faatapulaa lea, regulate ona le pine ona tutusa uma ia faamanuiaga e maua e o tatou tagata.

O le faamalamalamaga lena o le uiga tonu o le mea lea sa taumafai atu o le tatou exporters. O le tulaga i le tatou SAPFROM..

**Susuga Hon Tuilaepa Fatialofa Auelua Sailele Malielegaoi (Taitai o le Itu Agai):** Lau Afioga i le Fofoga Fetalai....

**FOFOGA FETALAI:** Ia, malie lau Afioga i le Minisita se i tuu atu lea avanoa i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Ou te lagona e taua foi le saunoaga e pei o se matagi agi i fale ia le malu ma le taua o le saunoaga a le Afioga i le Minisita mai lava i le po anapo. Faamalo le tofa.

O le auau atoa o le saunoaga lau Afioga, o le tatou maketi. O le faatu o se tatou Pulega iinei e nafa ma mea ia. O le auau atoa lea ma o se itu taua tele le vaega lea ua oo i ai le Minisita. E i ai le taimi na taofi ai ia le tatou ulu, ae taofi mai e le Malo i Niu Sila. Na ou faatonuina lea o le Minisita i lenei taimi o Faatoaga e taumafai e fesootai ma le Malo ona e saunoa lea i le Minisita e alu ane e fai se suavai e faavela ai le ulu. A vela loa ona e fai lea i le Minisita e alu ane e tutui ai lona lima i totonu o le ulu lea se i tulou, e leai lava ma se lago tui e toe ola ai, ona malamalama ai lea i le mea lea e tatou te taumafai atu.

O le faaaliga a le Minisita ia te au, e le aiaina e le Malo mea faapisinisi. Sa ou taumafai foi i le vaalele i le Palemia e fesoasoani ifo i le vaalele, tusi mai foi le Palemia ia te au, e oo loa i mea tau commercial transactions faapisinisi, e le aiaina e le Malo. Na ou tusi i ai i le Palemia, sa ou manatu e sui lau faaiuga, ona e le o mea na na sau ai le Palemia o Kirk i le tausaga e 1973 sa fesoasoani mai ai i le Forum Pacific Line. Ae taua le faatupu manatu i le maketi lenei.

Lau Afioga i le Fofoga Fetalai o lea foi ua taua le faamanatu mai a le Minisita, sa i ai le tatou Pulega faapea, Copra Board, Cocoa Board faapea foi ma le PMD Produce Marketing Division. O le a le mea na tapuni ai? Ua aia le Malo, i feuiaga faapisinisi. O le mea moni lava lenei lau Afioga i le Fofoga Fetalai, lea e mau i faamaumauga. E 100 ia mea o copra sheds i nuu i tua sa teu ai le popo, e 44 ia faleloa sa taape i totonu o Samoa o Savaii ma Upolu a le Kamupani a Nelesoni.

Na aia loa le Malo i gaioiga faapisinisi, oki atoa ai le popo oki le koko. O lea ua leai se popo, leai se koko. O le tulaga foi i le Willex, o lea foi na matua oti atoa ia le shipment a le Willex, o mea ia o ava lea na ave i Europa. O ai na tauaveina ia le tulaga i lenei gau? Na tauave lava e le afaapisinisi.

O Niu Sila lea sa saunoa i ai le Minisita. E taua tele le mea lea sa faaali mai e le Minisita i Niu Sila. Ua ave uma e Initia ia le talo, o le eseese o le tulaga lea, o Initia ia e faapisinisi i Niu Sila i Aukilani, o Initia mai Fiti. E i ai ia o latou aiga la e supply atu ai le talo. O le mea foi la lea, lea na fai ai ia le tatou fale lea e i ai nei, e alu atu ai ia le tatou talo ae o la foi e i ai outlets a isi faapisinisi a la foi e i ai ia pisinisi a le aiga lea o le tama lea o Charlie.

A o le fofolena, o le i ai lea i totonu o Aukilani o se fale e toai taunuu i ai ia le tatou talo, a le aufaipisinisi a Samoa.

O le tulaga la lena o lea ua i ai i le taimi nei ou te lagona, e pei ona avatu le fautuaga, se i silasila ane i ai i le ono faaaogaina o le fale lea ua uma ona faatau a le tatou Malo. E le gafatia e tatou tagata ona faatau ni o latou fale e pei o le anoano o le mau Initia lea e i ai i Niu Sila. E ono fofolena ai ia le faafitauli lea. Tatou taumafai e amatamata, i le faaaogaina o le seleni lea, ae o le tulaga lena na oti atoa ai le popo, koko ma le fai. Ia o le fai la na lavea i le faamai, ae toe atili aafia ona ua agai le Malo e interfere i le gaoiga a le aufaipisinisi.

O le tulaga foi i le SROS, lau Afioga i le Fofoga Fetalai, o le ala tonu na faatu ai le SROS, a fai loa e faaletonu le ave i fafo, ona o tatou agai loa laia lea e fau oloa i totonu o le atunuu, e faaoga i ai oloa ua le mafai ona ave mata i fafo, e tai pei la o le talo. O Niu Sila e na o le talo lelei lava e mafai ona ave, o le SROS e so o se ituaiga talo e oo lava i talo susu, e gaosi mai ai le uisiki. O le taua la o tulaga ia sa taua e le Minisita, o mea lelei uma lava. E tatou te taumafai e talanoa ma le Private Sector i le auala silisili. Ia manatua lelei, o le faatulagana o tau, e le talafeagai le mataupu lea na laga mai o le fixed o tau. I le tulaga lava i le faatulagaga o tau. E seti lava e le demand and supply, o le manao ma le supply po o le tali manao.

E tele loa talo e soona ave i fafo, palasi ma le tau. E oo foi la i fesootaiga. E taua le fautuaga, fesootai ma o tatou tagata aemaise i latou ia i ekalesia. E i ai le tagata na ou talanoa i ai, o le a le mea na e le alu ane ai e faatau ia ni au talo i tatou talo. Ae fai mai le tala a le tagata, “Tui, e oo loa ina faatau le talo, e 2 mea ou te vaai i ai, ou te vaai i le talo e taugofie ma le tupe lea i lau taga.” O lona uiga la, o le a lava le tatou manao i mea e fai, ae oo loa i le faatau o le mea lena e vaai i ai le tagata faatau. E numera 3 le tulaga o le lotonuu, ae muamua vaai i le tau ma le tupe o uu i le lima. O realities ia o le tatou soifua. Ae o le tulaga lea, tatou te fai fuafua se i silasila i le faagaioiga o le fale lea ua i ai e toai atu i ai a tatou oloa.

E masalo o le mea e tatau ona tilotilo lelei i ai le Pulega, o le fale lea, lea ua faatau i Aukilani ma lona faagaioiga ona sa 2 o tatou fale na i ai, i le taimi o le Esetete Tausi. O faletele lava, e taunuu atu ai oloa e teu ai ma le fale e faatau ai. O le a le mea na tupu? Gaugau uma. Aisea? Pulega e faaletonu, o le mea la lena ou te lagona e fesoasoani tele i le Minisita ia le tulaga o le Pulega toe fuataina.

Ae o le mea faaiu lau Afioga. O le mea faaiu lava lea ou te avatua e taua tele. O le aumai o mataupu i le Kapeneta, ina ia silasila i ai le Kapeneta, aemaise le Palemia. E silasila i ai le Kapeneta ma tapa lipoti, ia matua manino lelei i le Kapeneta ona tapa lipoti mai le Matagaluega. Ona silafia ai lea e le Kapeneta le mea e tatau ona fai. O le mea ou te popole ai, a o faagasolo a tatou talanoaga lau Afioga. E tu ae lava le isi Minisita fai mai, ua ia taofia le mea lea ma lea mea. Ou te popole i le mea lea, e tatau ona soalaupule. O upu e masani ai tatou “fau tele le fale o Samoa.” O le tele o

sulu e maua ai figota, o le tele o popo lau Afioga e sua lelei ai le lolo. Ae manuia le lauga. A o le toe taotao atu lava, vaai ina ne i te i ua tatou televave.

**FOFOGA FETALAI:** Faafetai o lea ua maua le finagalo o lau afioga le Taitai o le Itu Agai. E taua foi le tuualalo. O lo o molimoli mai foi ma luitau. O lea foi e faafofoga ma le totoa le Palemia ma le Kapeneta aemaise le afioga i le Minisita. O le taua foi lena, e leai lava se mea e le taua. Ae faalagolago lava i le loto i le Minisita ia lototele.

Tulai mai lau afioga i le Minisita.

**Susuga Hon LAAULI LEUATEA POLATAIVAO FOSI:** Ia faafetai i lau Afioga i le Fofoga Fetalai, faamalo atu foi i lau Afioga i le Taitai o le Itu Agai. Well spoken, point taken. A o lea lava ou te tausisi i le tatou Tulafono Tumau, e faatoa ou tali lava i le tagata na lauga i le mataupu lea. Ae le afaina, e le tuua lo tatou va nonofo, ua ou talia ma le agaga faaaloalo lau tuualalo.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e na o le pau lava lea o si mea. O le ala lena o lea na ou lauga ai i le aotelega, sa ou talanoa ai i le Tala o le Tupe atoa, ina ia mafai ai ona ou talanoa i mea taitasi. E pei lava o le suavai, e fue loa le suavai, ona e tilotilo loa lea po o a mea la e i ai i totonu, o mea uma lava. O le ala lena na ou talanoa atu ai i le aotelega. I le itulau muamua ina ia ou avanoa ai i mea uma lava i totonu o le Tala o le Tupe.

**FOFOGA FETALAI:** Malo, e leai o lea lava e maua lou avanoa. Fesoasoani mai foi ma aumai lau tuualalo.

Ia saunoa lau Afioga i le Minisita, faaauau le saunoaga.

**Susuga Hon LAAULI LEUATEA POLATAIVAO FOSI:** Lau Afioga i le Fofoga Fetalai, se e faigata tele lenei mea o le faaaloalo. A o tagata ua matutua tagata, ua latou silafia foi le mea e tatau ona fai. Ae faafetai, faafetai tele le tuualalo ma le fesoasoani mai. O le ala lena, ioe, e le avea mea na tutupu ma mea sa o tatou faaletonu ai i aso na e fai ai le taimi lenei. Ae lafo maia le faatuatuaga i le Palemia ma le Kapeneta, ma lenei auvaa. E leai se mea e tasi ou te tu ma folafola i i, e le i ioeina e le Kapeneta, o le upu sao lena. E leai se agatonu ia te au, ou te fofola ai se mataupu lenei ma le faafofoga a Samoa, e le i taliaina e le Palemia ma le sui Palemia ma le auvaa lea.

Na ala ona ou tu atu, ua afa e tasi le finagalo ou te fai atu upu ia, o le agaga moni lena, ae faafetai mo le tuualalo.

Ua ou toe foi mai i le SAFPROM lea sa taua anapo, o se atinae lelei tele. Ma ua sauni lenei polokalame e faaleleia atoa tatou packing house. O fale nei o lo o i ai le tulaga sa amata ai le fesoasoani lenei, e tatau ona lelei fale



e fufulu ai oloa ma pack ai oloa, ma palaka ai container, fai uma gaioiga mo le avega i fafo.

O le tatou fale lea e i Atele, na amata mai le tatou SACEP, faafetai i lena polokalame. Na amata e le Afioga ia Le Mamea Ropati, le afioga i le Sui o le Fono o Sui Tofia. Ona ou sau lea faaauau i le tausaga ma le afa lea sa ou i ai, faaauau mai i le taimi lenei, o lea la ua sui i le taimi lenei. O le fale lea e le o toe ofi, e le o toe lava palaka, e le o toe lava ona fata, e le o toe lava le afaigaluega aua e tatau ona tatou tilotilo i le auala e expand ai.

Ma ua i ai i le taimi lenei le fuafuaga e toe fau se isi fale tele la e i Atele, masalo e amata i le masina fou, tapenaga, e tuueseese ai le meli. Tapena ai talo felesi ma ulu felesi ma manioka felesi ma isi mea, ae faavasega le isi pito i le avega o tatou talo faaaisa ma isi mea i isi pito. O le faamoemoe ina ia tapena i le tulaga e gafataulimaina i puipuiga mai faamai, o iniseti. O lea sa saunoa le afioga ia Tuilaepa, i le manutui lea na maua ai le tatou ulu, lea na ala ai ona poloka le ulu. E sao, leaga tatou te le iloa le ala o mea. A o le auala lea o le a matua tapena ai le fale lea o le packing house. E matua tapena i le tapena e gata ai. Ina ua tatou poloka i le talo felesi, sa le i ai se tatou talo e toe auina i fafo, e leai se talo e tasi. O uluai container na taumafai e ave i Ausetalia, o au na ou alu, o maua ma Faasoo. Na ma o ma Faasoo i Brisbane. Na ave ai a tatou uluai container e 2. Na matou o, taumafai foi ma lena tamalii ia Sua Tanielu, lea sa taumafai i le palota. Na matou o e taumafai ina ia toe tatala mai. Na outou iloa le mea na mafua ai ona tatala, ina ua vaai mai le Minisita o Faatoaga a Ausetalia lea ua ou alu atu. That was the only way. Ona tala lea, e le i atoa se 2 itula ae toso i tua container. Na ma o ma Faasoo, talofa e i si toeaina, Saleaula se e le galo oe. O le a le isi mea na ou fai? Na ou tu i le leitio i le ao ma le po, e valaau Samoa. Samoa le atunuu pele, o mai i i, o lea ua aumai la outou taumafataga, omai e faatau mea ia. Ioe, o i ina, na mafua ai ona vave ona taulia mea ia.

**Susuga Hon Tuilaepa Fatialofa Auelua Sailele Malielegaoui:** E na ona ou fia fesili atu lava. Na ave le Ofisa Sili o Pulega o le Matagaluega.

**Susuga Hon LAAULI LEUATEA POLATAIVAO FOSI:** Ioe, o lea e faasolosolo atu. Na matou o ma Tilafono, o Seuseu, o le aumalaga lena na matou o. Ou te le i alu na o au, aua ua fai mai le mea a nisi, ua pei le Minisita o se sales man. Ua alu lauga solo i le lalolagi e faatau. O le a lau tala na ou fai atu i le taimi lena. That's my job. O le tautala o lou gutu tulou, e valaau le lalolagi, omai e faatau mea ia a Samoa. O le a mea na tupu, na omai le atunuu. E le i atoa se aso na faatau ai container ia. Na i ai lava na i mea na faaletonu. Ae a? Na faatau i le loto nuu. E le i umi lava ae fufulu container ia. O le uiga lena o lau tala lena Itu o le Maota ma le faafofoga a Samoa.

O metotia na o le taimi lenei. E fiafia lava le tama ma le tina la e i Niu Sila ma fai mai, se o mea a lo tatou atunuu. Talofa e, se o mea a lo tatou itumalo. Talofa e o mea a si tama, o ai o le a le alofa.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, na ona ou toe tulai atu lava. E taua tele le faasilasilaga lea. E pau le mea lea ou te manatua, e le i faataoto maia sau lipoti ia te au, ina ua e toe foi mai.

**Susuga Hon LAAULI LEUATEA POLATAIVAO FOSI:** E sao oe Tui, na e aumaia le pule ia te au e fai uma ai mea na. I don't have to come back to you.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e sao. O le ala lea o lea ou te fautua atu ai. Ia e lipoti ia Fiamē ma se i uma le tou talatalanoaga, ona faatoa fai lea o au mea. Ona o lea ou te vaai atu e te alu lava oe.

**FOFOGA FETALAI:** Tuu atu le avanoa ia Faleata Nu 3.

**Tofa Lealailepule Rimoni Aiafi (Faleata 4):** Lau Afioga i le Fofoga Fetalai, o mea ia e saunoa i ai le Afioga i le Minisita, ou te iloa uma lava lona naunau. Tatou te naunua uma lava i le mea lea. E pau le mea lea ou te fia malamalama ai, manatua o tatou o lea ua i ai nai advance i luga o fefaatauaiga. A tatou talanoa i fefaatauaiga, e le tasi se Sector. E tilotilo i le atunuu atoa. O lea e i ai le Minisita o Fefaatauaiga, o le mea lea ou te talanoa atu ai i mea tau trade. O lea foi o le a fai le PACER Plus, lea ua leva ona tatou talanoa ai. O lea o le a fai le ofisa iinei i Samoa. Aua o le isi mea, tatou te o as a region, e faigofie ai ona ofi a tatou mea i totonu i mea nei.

Aua e moni le Minisita, aua a ou alu atu foi Ausetalia ma tatou fagusea ma mea na, e toe tatia uma lava i le lapisi. But o mea la na e negotiate i le vaai, ia manatua e i ai foi...O atunuu nei, e malolosi tele a latou aufaiaatoaga, e le risk ina e le auvaega ia ia ituaiga mea laiti nei. Ae a talanoa loa as a trade export. O lea foi e i ai le tatou ofisa lea o le export i Initia i le mea e...

**FOFOGA FETALAI:** O lea ua maua, le fautuaga ae taatia mai, o lea lava e saunoa le Minisita.

**Susuga Hon LAAULI LEUATEA POLATAIVAO FOSI:** Malo faafetai i lau Afioga. E saga saunoa mai lava Tuilaepa ou te iloa o le faifaatoaga. Ae o le saunoa mai le o Leala e ai i le maketi. Ou te foi mulimuli atu lava ia oe. O le agaga lena lau Afioga i le Taitai o le Itu Agai, e le o se isi lava itu. O le tulaga foi o lou saunoa mai, na ou alu lava au, se o mea faatauva. Ou te tau

faanoi atu loa o le a ou alu ou te lauga i tagata e omai e faatau talo. E le o le agaga lena, seiloga o mea ou te iloa e tatau ona ou le faia, ona ou saunoa atu lea ia oe. Ae pei o le agaga lena, taofi, taofi, taofi, control, control, control.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e leai e le o le tulaga lena, e le o le tulaga lena e saoloto lava le Minisita. E pau o le mea e masani lava ona malaga faatasi ma le Ofisa Sili o Pulega o le Matagaluega e tuualalo. Ona e i ai taimi sa ou malaga ai foi ma Minisita, ae ou te le i sau i totonu o ou galue i le Treasury. Ou te te'i i lou faalogo atu i le Minisita ua ese ia mea e talanoa ai, ona ma omai lea i le fale, ou fai atu i ai. E pei lava ua e televave. Sa tatau ona e fesili mai ia te au. E pei o le tulaga lena, e i ai lava le faufautua, e na o mea lelei lava.... E leaga e taua tele le malaga ma le Ofis Sili o Pulega o le Matagaluega e tuualalo atu.

**FOFOGA FETALAI:** O lea ua maua le fautuaga lau Afioga i le Taitai o le Itu Agai.

Ia see ese ia le Minisita i le lua va ma le Taitai o le Itu Agai o le a umi ai le tatou Fono, ae faaauau mo le manuia o le atunuu.

**Susuga Hon LAAULI LEUATEA POLATAIVAO FOSI:** Ua mavae na atuvasa, ua uma foi le ma taimi sa ma feagai ai ma le Susuga ia Tuilaepa. O lea ua ma feagai ma Fiamē. Ia e silafia e le Atua mea uma, ae faafetai le tuualalo. O le tapasa lena o lou olaga, usitai ma faalogo. O na e te silafia lau Afioga.

Ona ou oo mai lea i le SAFPROM program. E pei ona ou fai atu, ua mautu le tatou Packing House i Atele. A o lea ua fuafua nei e faalelei ma fai le tatou Packing House i Salelologa. A outou silasila i le mea la e fai i Salelologa, oi talofa e, le taumafaiga o le tatou ulu faaiga, o le talo faaiga, o le manioka faaaisa, o le fai faaaisa, o le esi faaaisa, o le niu faaaisa, ia o la e fai i lalo o niu. E momoli lava le faafetai i le tamalii la e faia ma lau faamalosi ia onosai, onosai o lea o le a taumafai atu. A o le tatou esi, o la ua mafai ona ave i le tulaga lea o le sali uma o le esi ae ave i pepa iila malolosi, ona avatu lea fai ai faausi ma meatausami a lo tatou atunuu i o. Oka se agaga faafetai ia te au, ua tulai mai nai tagata nei. O lea na ou fai atu ai, o lau galuega o lou tutu i tua o tagata nei latou te faia le galuega. That is the Government duty, taumafai ai galuega nei. Ina ia mafai ona lelel atoatoa fale gaosi, e mafai ai ona ave a tatou mea nei i fafo.

O le tatou polokalame o le SAFPROM, o lea ua ou musumusu i le Minisita o Galuega tetele a le Malo. Faafetai i le Atua o lo o i ai se vaega tupe o le Polokalame lenei, e fai ai foi ma aualagalue e faapitoa i faifaatoaga. Auala foi ia e le faataina, e pau lava le mea o le sao i uta o le taavale. E leai nisi mea, alavai, pefu le auala ae fai. E tai lima kilomita i e auala e tasi. Ma i ai

auala ia ua faatulaga pe 5 ea pe 6, e uma ona sau lea o Tilafono e tau mai. Ma filifili ai itumalo i Savaii ma Upolu ona pito sili ona manaomia galuega tau auala i faatoaga. O lea foi na ou fai atu, o se taimi muamua e saofafai uma le komiti faapitoa. E le faia e au le tonu. E lafo foi ia i latou e o e filitagaga po o ai itumalo e sili ona manaomia auala galue. E i ai foi faatoaga i Sagone i le afioga a Tapuai Laina ua fia i lagi le folauga. O lene tamalii o le atunuu ole numera tasi lene o le ava i Samoa atoa. Ae talofa e i le auala e alu i le faatoaga lea. Ioe, tiga, faigata, na ou tolotolo ai lava i le aega maualuga ou te alu ou te vaai i le faatoaga lea. E matua masofasofa le auala, talofa e, ua alu le uso. A o le polokalame tonu lava lea na ou manao e ave i ai. E leaga foi e le taitai ona lava le faasoaga a Olo, e tele a tatou auala o lo o tau fai. A o lea ua aumai tonu lava le fesoasoani mo mea lava tau faatoaga. O lea foi na ou fai atu muamua, o le a toe aumai le tatou polokalame lea o le Mechanization. A na e silafia e le tatou Kapeneta na tatou i ai. Na ou manao e talosaga le Malo e aumai uma masini mo faatoaga. E landscape ai, e palau ai, aveese ai tagutu ai laau ma ala. Ae taatia mai lava na o le palapala e suotosina e le faifaatoaga ma fai galuega tau faatoaga. O le agaga lene ma le tautinoga, ina ia mafai ona faaauau le...

**Susuga Hon Tuilaepa Fatialofa Auelua Sailele Maliegaoui:** Lau Afioga i le Fofoga Fetalai, o si mea sia, na o se tuualalo. E taua lava le mea lea o le Mechanization, ma e taua foi i le faatupu manatu. Atonu e toe silasila pea i ai. Leaga e i ai, le mea faapena na fai muamua, Mechanization mo nuu uma lava, o lea sa tufa mai ai palau ou te le iloa pe e te manatua. Sa tofu lava le nuu ma le palau. O le mea ua tupu, ua leai lava ma se eleele na sua ai, a ua feoai ai tagata e ta lau ai maa e tanu ai o latou fale ma malepelepe ai lava. O le tulaga lene e silasila foi i le talafeagai. Ua o isi aiga e lau mai ai popo i tai. E na o sina tuualalo atu, aua e le masani ai le toatele. Ae taua le faatupumanatu.

**FOFOGA FETALAI:** Ua maua le faasoaga,

**Susuga Hon LAAULI LEUATEA POLATAIVAO FOSI:** Ou te matau e pei o le taimi lene po o le 15 o ou tausaga. A ou nofo e tao popo a lo matou aiga i Samatau, o au la sou ave palau ai i le palau lea, me. Sa ou fealua ai i le palau lea e lau uma mai salimata a le nuu ma o i uta i faatoaga. O la e faafofoga le nuu lea, ona e 15 tausaga o ou ola i i. E tao le popo, liliu le popo, fai tui ipu. O le life lene. A o le saunoaga lea i palau, se na ala lava ona faaletonu o le tatou faatamala. Ae pei ona ou fai atu, e le aumaia le faatamala i le aso ananafi e fai ai le aso. Tatou te manaomia le mea lea, na ona oomi lava mafola le mea. Sau le masini e toto ai le tiapula ma mea faapena.

**Susuga Hon Tuilaepa Fatialofa Auelua Sailele Malielegaoi:** E aoga foi le tilotilo i mea na tutupu ananafi, ina ne i te i ua avatu foi, e toe oti foi i le aso a taeao. E faatupu manatu.

**FOFOGA FETALAI:** Faafetai, o lea ua oo mai le fautuaga. Tulai mai lau Afioga i le Minisita o Galuega.

**Tofa Hon Olo Fiti Afoa Vaai (Minisita mo Galuega, Fealuaiga ma Atinae Eseese):** O si mea lava e fia faamalamalama. Ou te manatua le 2016 sa ou fesiligia ai palau ia. Ae na muamua lava le Taitai o le Itu Agai, fai mai. O le a ea le mea e te fesilisili soo ai i na mea? A o lea foi ua toe fesiligia. Ma le faaaloalo.

**FOFOGA FETALAI:** Faaauau le saunoaga lau Afioga i le Minisita.

**Susuga Hon LAAULI LEUATEA POLATAIVAO FOSI:** O le a ou see ese ma palau. O le a ou talanoa atu i excavator ma bulldozer ma loaders ma traitors, ma trucks. O le mea lena o lea o le a fai. Ou te le o talanoa atu i le malaevaalele o mea tau faatoaga ia ou te fai atu ai. E pei ona ou fai atu...

**FOFOGA FETALAI:** Tulai mai le sui usufono mo Faasaleleaga Nu 5.

**Afioga Peseta Vaifou Tevagaena (Faasaleleaga 5):** Lau Afioga i le Fofoga Fetalai, faafetai i si ou uso a Minisita. E leaga o lea ua taua lou igoa i palau ma mea ia. Ae pau lava le mea...

**FOFOGA FETALAI:** E faapea lava au o le malaevaalele lea e taua lou suafa.

**Afioga Peseta Vaifou Tevagaena:** Lau afioga, e masalo faafetai i le Atua o lea ua tali mai lau afioga i le Minisita i nai tatou export foi ia sa ou talanoa atu ai, ae faafetai i le Atua o lea ua tali mai le afioga i le Minisita o laau. Ae pau lava lea o le mea o lea e misi, ona o le e talanoa le Minisita i talo ma isi mea. Ae se i vaai le ta nonu po o le a le tonu. Ua tataua ona ave foi ma le ta nonu i fafo aua o lea ua lelei le tau o le ta nonu i lenei vaitaimi. Ma le faaaloalo lava.

**Susuga Hon LAAULI LEUATEA POLATAIVAO FOSI:** Ia, aua e te faalogo ia Leala. O Leala, e le i mafoefoe lava lona fatafata i se pea i se niu, he is a town boy. E alu lava ia faatau ana mea i le maketi. A o taua Pese, o oe le isi exporter. O e manatua le pau, tulou lava. E le fai atu te i ua aafia se finagalo. O lau faataugatalo lava lea na alu atu faapau le isi sui o Gagaemauga Nu 2. O oe le isi tagata, aua e te popole, aua e te popole, leaga

afai e te saunoa i mea tau export, ou te malamalama lelei Seioaana ma le ta mea sa fai. A o le ta nonu, na uma lava le ta faamasinoga, ma le toe fia faataua e se isi le nonu. Ua leai ma se maketi e toe fia omai i le ta kamupani. Aisea? Ua tauvlea i le ta mea lea na fai. O le tali lena. A e toe fai mai nei ua leaga uma le mea talu oe.

Lau Afioga ua ou manatu ua tataua lava, leaga o lea ua fesili mai Peseta i le nonu. Aua e te popole, e toe oso le la. Ae pei ona ou fai atu, uso e le galo oe. E le galo oe, ioe, le laina atoa lea e i luma, e matautia lau galuega sa fai i o i le fale le la. O lea ou te iloa. O la e tanu ai lou ofutino i le tanuga o mea la. O lena e te malamalama.

Lau Afioga o le agaga lena, o lea na ou fai atu i le tatou \$51 miliona lea sa fai atu. O le atoaga lena lau afioga i le Fofoga Fetalai, o le afuafu atoa o le faamoemoe lena o le atinaeina o faatoaga. E ave le fesoasoani i le aufaifaatoaga, ae tulai atu le Malo e tapena mea ia e ave ai a tatou mea ia i fafo. E pei ona ou fai atu, o le ava, o mea uma lava o le a tapena. O lea foi na saunoa nisi o sui e ala i le tatou SROS. Ioe, o le tatou SROS o le tatou ava e mafai ona liliu i le isi medicine ava. Ioe, e tele le mea e mafai ona fai. O le tulaga foi lea e faapea e aloalosa le Malo ma pisinisi. E tataua ona i ai mea ona tau o State Business a le Malo, e tataua. E leaga o i ina e tua i ai le Malo i mea e le gafatia e tagata Samoa ona fai, ona alu lea o le Malo e fai. Ua a nei le tatou falaoamata ulu? O lea o le a savali le 20 tausaga o fai, e leai lava se isi o pick up ina. Aisea? E le o se mea faigofie.

**Susuga Hon Tuilaepa Fatialofa Auelua Sailele Malielegaoi:** O le fesoasoani i le saunoaga a le Minisita. O lea ua uma ona... fau le fale. Sa ou alu tatala, e faatino ai le agaga lea ua aumai tonu e le Afioga i le Minisita. Ia fai se kamupani, a o se kamupani latou te fausia oloa ia e ave ai le tatou SROS o se research unit. E na ona research atu lava ma maua lea product fou ma ave loa e produce e latou. Ma a faatau ma maua mai ai tupe a le atunuu aemaise foi e faagaoioi ai ia galuega a le SROS mo le faaaogaina o tatou oloa mata ia e le mafai ona ave i fafo. Ae a ave foi i fafo, e ono aafia i le quarantine. A o le faaaoga i inei tatou te le toe popole ai i ni tulafono e puipuia ai ni faamai. Aua o lea ua alu atu o ni mea ua uma ona gaosi, e pei o le uisiki. O le tulaga foi lena e taua ai le faaaliga lea ua aumai, ae faagaoioi loa le tatou fale lena. Ou te manatu o la ua amata, e pei lava ua uma ae faagaoioi loa ma faatu se tatou kamupani e faatino ai mea ia aemaise le gaosiga o vai eseese e taua, le iloa pe i ai se vai e titina ai nei faamai. Aemaise vai e faaola ai musele o le tino, ae amata mai e oe ona faaaoga se i o matou mataitu.

**FOFOGA FETALAI:** O lea ua maua lou finagalo, faaauau mai le saunoaga a le Minisita o Faatoaga.

**Susuga Hon LAAULI LEUATEA POLATAIVAO FOSI:** Lafo maia Tuilaepa, lafo maia le faatuatuga, e leai lava se fautauga e foi fua o lea ua ou faamauina uma. O le agaga lena lea sa taumafai atu. Faafetai o le ua faatino le tatou commercial arm, o le mea lena o le a fai. O mea e le gafataulima e o tatou tagata. O le matafaioi lena a le Malo. Ou te alu ese ma le Matagaluega ua taunuu le 10 tane, oka o le falaoamata ulu. Ou te sau nei lava e le i faia lava se mea. O le agaga lena. E 10 tane o le falaoamata ulu e ave. O lea la o le a toe amata ona toe faufau. Ae sao a oe. Ua uma ona ou faatonuina le pule o le SROS e aumai uma lava faamaumauga o vaituloto ma vaipuna ma mea uma o Samoa, e test, ia test uma mea ia. Se i aumai se i tatou tilotilo po o le a le isi tatou atinae e mafai ona fai i le vai lea. Silasila i le vai lea e taumafai e nai tagata o lo tatou atunuu, e pei ona ou fai atu. E o atu i le lalolagi faasasaga mai nifo feai, tulou, o isi foi faipisinisi fai vai a le atunuu a le lalolagi atoa. Ae a ave le vai i lalo o lo tatou Malo i maketi e le o mafai ona o i ai i latou. O le a le mea e tupu? A tatou talanoa i le taimi lenei, e afe ma afe ma miliona mat tiliona lita o le vai la e tafe i le sami i le taimi lenei. O tatou punavai uma lava i Samoa, e leai ma se tatou mea o faia i ai. O la e alu i le sami. O a faaaliga o mea na, o tupe uma mea na o la e alu i le sami. O le a la le matafaioi e tataua ona tatou faia? E tataua ona tatou tilotilo, e fai so tatou fale vai lelei, e taulamua ai le Malo e ave i maketi ia e ave i fafo. Na taumafai foi na i isi uso, ona ua pau lava o le mea ua oo i ai lo latou taumafai. E le mafai ona latou tauavea le maketi.

Ae a talanoa le Malo o Samoa o le vai lea a Samoa, Iapani, Kolea, Saina o fea uma atunuu o Amerika, e matala le faitotoa. E mafai ona totogi lou pasese ou alu i Fiti, ou vaavaai, e 2 fale vai tetele na ou alu i ai, Fiji Water ma le Aqua Fiji. E 2 fale vai na, na ou alu i ai, e matautia le mea lau Afioga i le Fofoga Fetalai. E le i lalo ifo i le 30 container i le aso, e produce e fale vai ia mo maketi o le lalolagi atoa. E le i lalo ifo o le \$200 miliona le tax e totogi e fale vai ia i le Malo, a o lenei lava tatou te nofonofo ma tatou mataua ma tatou tilotilo, a o mea faatupu manatu lau Afioga ina ia atagia le mea lea o le commercialization e faaaoga ai le itutino o le Malo, leaga e tataua ona tu ai le Malo e fai, e fai mea nei ina ia fesoasoani i le totogiina o tatou aitalafu. E faapefea ona totogi mea ia? E le mafai ona tatou faalagolago i le afu o tagata. O le mea e tupu sii le tau o lea mea, sii le tiute o lea mea, sii ane i luga lea mea, ae tataua ona gaoioi le Malo e fai ni faiga fou. O le auga atoa, we need the new money, the new investment and the new people.

**FOFOGA FETALAI:** Ia, tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e taua tele le tulaga lea o le vai, ma ou te fautuaina, fai loa se tou iuga ina ia faamaea ai loa le poloketi lea a tatou e sau mai Alaoa, ona o le vaega tele o le poloketi lena o le vai. Faatoa ou iloa lava lea e malosi

lau finau pe a pasia le poloketi lena. E \$100 miliona ae aumai e le o se aitalafu, o le grant, foai fua.

**FOFOGA FETALAI:** Ia, malo, faaauau mai le saunoaga a le Minisita...

**Susuga Hon LAAULI LEUATEA POLATAIVAO FOSI:** Ia, ou te le aiaina tulaga tau siosiomaga, ae o le a avatu pea le...

**Afioga Fuaava Suluimalo Amataga (Aleipata Itupa i Luga):** Lau Afioga i le Fofoga Fetalai, pe maua se avanoa...

**FOFOGA FETALAI:** Ia, malie lau Afioga i le Minisita se i... sui usufono mamalu, se i tulai mai le sui usufono mamalu mo Aleipata Itupa i Luga.

**Afioga Fuaava Suluimalo Amataga:** Ia, ua faafetai atu i lau Afioga mo le avanoa. E leai foi se agaga e faalavelave i le saunoaga matagofie a le Minisita ona o se tuualalo i le tulaga foi lea i le saunoaga ona o lea ua taua le tulaga tau le suavai ona o lea e maua faapea o le tele o le vai o lo o maumau ona tafe i le sami. Ae a i ai fuafuaga, e i ai lava le vaega foi lele o le pasene e faaauau ai pea foafoaga a le Atua, e tatau lava ona faaauau pea le tafe o le vai i le suasami foi lele aua e manaomia foi e figota ma meaola o le sami tulaga ia pe a fai ni tatou fuafuaga. Ne i te i ua poloka umi ae afaina foi le gataifale, ona o le environmental flow. Ia o nai mea na mo le... na o se fuafuaga ma le agaga faaaloalo...

**FOFOGA FETALAI:** Ia o lea ua maua lou finagalo ma lau faauilavea, o lea e faafofoga mai le Minisita.

**Susuga Hon LAAULI LEUATEA POLATAIVAO FOSI:** O lea ua maua. Faafetai aua o oe le isi lauia ua leva ona e evaeva i i le siosiomaga. Malo, o le a talia lau fautuaga.

Ia, lau Afioga, e pei o le agaga lena o lea na tau avatu.

**Afioga Fuaava Suluimalo Amataga:** Lau Afioga pe maua se avanoa. Leai, ona o lea ua saunoa mai le Minisita o lea sa evaeva i le siosiomaga.

**FOFOGA FETALAI:** Ia, afai lava e te silafia e le i evaeva, o le a le mea e te popole ai?

**Afioga Fuaava Suluimalo Amataga:** Ia, ua lelei faafetai. Ae mo faaumauga ta te le i eva o lea foi sa ta galue. Faafetai.



**Susuga Hon LAAULI LEUATEA POLATAIVAO FOSI:** E i ai le upu a toeaiina, o le eva i le laufau malu. E le o se upu faaletonu tulou oe le uso. A na ou fai atu e te tafao, ia ona e toatuga lea. A o upu uma lava na e faalautele ai lau galuega, e silafia e le Atua lau galuega. Ae a le tali lena o lau galuega lea ua e saofai i le Nofoa o le Palemene? O le tali lena, ae aua le faatoalia lou finagalo i sau upu.

Ona manatu lea lau Afioga, o le atoaga lena o sou faamoemoe, lea sa faatalauula atu foi i le taumafaiga o le...

**Afioga Hon Lautafi Fio Selafi Purcell (Satupaitea):** Lau Afioga i le Fofoga Fetalai, ona o lea ua ou faalogo atu ua lamalama faaii le saunoaga a le Minisita, ou te le i fia faalavelave foi lava i le taimi sa saunoa ai, ona o lea ou te faalogologo atu i le tatou export authority lava lea ma ana galuega e fai, e pei o lea e tau lava na o le aufaifaatoaga lava. Ae i ai foi isi tatou exporters lea foi e manaomia se fale, se space e ave foi i ai latou oloa, tagata Samoa o lea e fia o i Niu Sila e ave a latou oloa. E tuualalo atu i le Afioga i le Minisita ia faaavanoa ma ia faafofoga mai foi latou o la e faatau le latou foi sao e ave i le fale lea.

E pei o le agaga lena o le fale, e tasi lava le fale e o uma i ai Samoa mo oloa Samoa. E pei foi o le vai, ia o meataulima, e tele lava nai tamai pisinisi, ae fai si taugata o fale foi ia e taumafai e lisi ai i Niu Sila, ia o le agaga lena o le fale. Na o le tuualalo atu i le Afioga i le Minisita, ia manatua nai faipisinisi na i totonu o fuafuaga mo le tatou fale lea. Ia ma lou faaaloalo.

**FOFOGA FETALAI:** Faafetai o lea ua maua lou finagalo. Onosai mai lava lau Afioga i le Minisita se i saunoa mai le Afioga i le Sui Taitai o le Itu Agai.

**Tofa Hon Lauofo Fonotoe Nuafesili Pierre Lauofo (Anoamaa 2):** Lau Afioga i le Fofoga Fetalai mo le faasaina o le taimi o le Afioga i le Minisita faamolemole mo se avanoa.

**FOFOGA FETALAI:** Onosai mai lava le Afioga i le Minisita se i... Ia saunoa mai lau Afioga i le Sui Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Faafetai. Sa nofonofu lava ma faalogologo ma le totoa i le saunoaga a le Afioga i le Minisita i le vai ma faguvai ma le maketiina o le vai i fafo. Na ou toe manatua ai le aso na ou i ai i le tatalaga o le kamupani vai foi lea sa fai i o i Mulifanua lea sa fai e Leala ma le latou vaega. Ua ou faalogologo atu i lena aso, o le folasaga atoa lava lea ua ou toe faalogo atu foi i ai. Ae ua ou le iloa po o fea ua fai i ai lena fale vai. Ae pau le mea lea ou te tau manatua pe \$20 miliona ea na alu ai i le tau faatuina o le fale vai, a o mama na lau Afioga. Atonu pei

lava o la e tu ai lava i totonu o le fanua o le WESTEC ia atonu pe asiasi ai pe toe mafai ona faaaauu lea atinae, aua o le manaia ia i le faalogologo atu i fuafuaga ia.

A o oloa lea faamolemole lau Afioga le mea mulimuli lea, o oloa ia e gaosi e le SROS, ona o lea foi sa taua i le saunoaga a le Afioga i le Taitai o lenei itu le tatou uisiki ma le alcohol, fagu na, pei o le liquor ia sa fai, ua ou le toe faalogo po o fea o fai i ai le uisiki lea ma le tatou alcohol. Ae ua tau lou mafafau i mea foi ia pe na silasila i ai lau Afioga ma le Faalapotopotoga, mea ia e fufulu ai aao pe a tatou omai i totonu o le Maota, mea o sanitizers. Ua ou sau nei ou vaai i le fagu sanitizer la e i fafo e 75% o le alcohol. Pe le mafai ona faaaoga ai, tasi lena oloa e tatau ona silasila i ai, pe le mafai ona gaosi e tatou aua o tapenapenaga uma lava ia mo le puipuiga o tatou i le Koviti-19.

E pei la o le tulaga lena na agai atu ai mo le maketiina i fafo, aua e moni e aoga ia tatou, ae le tele tele se tatou maketi iinei e le pei o fafo.

Ia o lau fesoasoani atu lea lau Afioga.

**FOFOGA FETALAI:** Malo faafetai o lea ua maua. Ia, faaaauu le saunoaga a lau Afioga i le Minisita.

**Susuga Hon LAAULI LEUATEA POLATAIVAO FOSI:** Malo faafetai. Ia, saunoa.

**Afioga Hon Tapunuu Niko Lee Hang (Vaimauga 3):** Lau Afioga i le Fofoga Fetalai, pe maua se avanoa faamolemole...

**FOFOGA FETALAI:** Onosai laitiiti mai lava lau Afioga i le Minisita se i... ia, tulai mai le sui usufono mamalu.

**Afioga Hon Tapunuu Niko Lee Hang:** Faafetai i lau Afioga mo le avanoa. Ia e le faalavelavea foi le saunoaga matagofie a le Afioga i le Minisita. A o lea ou te faalogo atu o lea e fuafuaina e le Afioga i le Minisita le gaosiga o le vai iinei e tau ai le tatou atunuu o le vai Samoa po o le a le faaigoaina. O se poloketi taua ma... a o lau fesili lava o le vai, pe lava. O lea la ou te faamanatu atu i lau Afioga, o le vai lea o Sili ua leva ona tatou taumafai i ai a o tatou tutu mai i le HRPP, pe i ai sefaamoemoega e faaoga mai le vai lena. O le tulaga lea e te saunoa i ai ia tele ni tatou vai ona na e malaga i Fiti e vaai i fale ia e gaosi ai le vai. E manaomia tele lava le suavai.

A o lau tuualalo, toe tatalo i le... aua ua sui le sui usufono o Leota Laki lea ua... atonu o le a fesoasoani ai e tatala mai le vai o Sili e gaosi ai ni vai se tele mai Salafai. Ia ma lou faaaloalo lava.

**Afioga Hon Loau Solamalemalo Keneti Sio (Sagaga 1):** Lau Afioga i le Fofoga Fetalai pe maua se avanoa...

**FOFOGA FETALAI:** Ia saunoa maia pe afai e aoga...

**Afioga Hon Loau Solamalemalo Keneti Sio:** Ia e le umi naua. O lea ua manino le mata o le vai i le mea sa faafesili ai foi anapo, o le agaga e pei ona taumafai atu ona o le faamatalaga foi e pei ona i ai le solo na alu atu i le Aso Gafua. Ui o lea, o lea ua manino le faamalamalama a le Afioga i le Minisita, e ui ina le atoa le \$51 miliona i le Tala Faaletupe lenei, a o la e ua i ai se vaega e amata ai i le \$11 miliona. A o faafofoga mai la le matou aufai pinati, leaga na toe alu atu foi le solo nei i le taeao. A o la e la ua ou malamalama i le mea na ma talanoa ai ma le Afioga i le Minisita, e le atoa le \$51 miliona i le Tala Faaletupe lenei, na o le \$11 miliona. O lona uiga e tai \$200,000 a le itumalo. O le mea la lea faafetai i lau Afioga i le Minisita o lea ua manino le mata o le vai o la e ua toe foi uma le matou vaega e toe toto le pinati aua le faamoemoe.

**FOFOGA FETALAI:** Malo o lea ua maua le saunoaga. Faaauau mai le saunoaga lau Afioga i le Minisita.

**Susuga Hon LAAULI LEUATEA POLATAIVAO FOSI:** Malo. Lau Afioga i le Fofoga Fetalai, o aga ia o le tatou Fono, a o le matagofie lea o lenei taeao? Tulai mai le Taitai o le Itu Agai, o ai o le a le talia se tuualalo? Tulai mai le amomua a le Tuiatua, tulai mai le isi Sinia o le sa Minisita o Tupe, tulai mai Loau. Ia silasila la i le matagofie? O le a ou talia uma a outou tuualalo. I'll put it in my pocket se i fai i ai le tonu mulimuli. Ae faafetai, faafetai tele mo timaiga ma mea uma. O mea ia na ou folasia atua, o fuafuaga na a le tatou Malo, a o lea ua matou lagona le matou agaga e aumai ai la outou tuualalo. E sao outou. E tele mea na tatou o foi fai, lea foi na taua le taumafai a nai uso ia na o fai le vai i Mulifanua, ia, ua pau o le mea ua oo i ai se latou taumafaiga, ae taumafai pea. Ou te fiafia i le mea na fai. They have the courage to start it. Ae a? Ia, o le tulaga lena, na feagai ma faafitauli, sue atu fai mai ua vaisualua le vai, sue atu fai mai ua le lava le vai, ae sa finau. E o atu i Niu Sila, oka, finau ma isi fale vai. Ua laki le faalauiloa a le HRPP na matou o uma ai i i Niu Sila, se na lau uma ifo ai vai matou faaaogaina. Ioe. Ae le faigofie. E faamalo atu ai foi i nai ia tamalii o le atunuu. Ae pei o le agaga lea na ou fai atu ai, o le tatou atunuu e taulamua. O lea foi ua saunoa e na i le Matagaluega o le Siosiomaga. E le faapea o le a o atu soona fai. E leai, tatou te matau lelei. A o le auga o la e fia feinu le atunuu. O tatou, tele vai la e tafe i le sami. O le upu sao lena.

Lau Afioga i le Fofoga Fetalai, ona ou manatu lea...

**FOFOGA FETALAI:** Tulai mai le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai na o sina faaopoopo a lea. E taua tele le faatupu manatu a le Afioga i le Minisita, ona o le vai lea i Mulifanua, e sau i lalo o le palapala, e sau i lalo o le eleele. E i ai lava nai faaletonu i le faalagolago i le vai lea e sau i lalo, leaga e alu alu lava uma pe a tuai ona pau atu le timu e toe faatumu ai. A o lea e i ai tatou vaitafe. O le agaga la, se i silasila ane pea i vaitafe ia, aemaise lava le vai lea i Sili. E taua tele le faatupu manatu atu i mataupu tau vai, a o le mea lava ia o le market ina o le vai, o lea ua i ai maketi i fafo e maketi i ai le vai.

A o le tulaga lena i le tele o vai ia a tatou lea e pamu mai lalo e pei foi la o le Esetete Tausi, o la e sau i lalo o vai ia e toa i lalo o le eleele. A alu alu la ua uma, mea na e le lelei ai vai e tulata i le sami. E vave tele ona sau le faasualua, ae manaia lava le agai i mea o vaitafe ia e sau le vai mai luga o le mauga. E pei e taua tele le vai lena. O o foi ia matou, i Falefa ma Falevao, tele le vai. Afai e te manao i ai, o le matua tele o vai e sau mai luga o mauga e siomia ai afioaga nei e lua.

Ia, a o oe foi e te tau atu i Falefa. Na ona tuu atu i ou tafatafa, ae o Savaii, e taua tele le fai ai o se isi kamupani vai mo le faataumafalia o le tatou atunuu.

**FOFOGA FETALAI:** Faafetai. O lea ua talia le fautuaga.

**Afioga Alaiasa Moefaauouo Malagaitutogiai Sepulona Moananu (Anoamaa 1):** Faamolemole pe maua sina ou avanoa...

**FOFOGA FETALAI:** Ia pe maua se avanoa o le sui usufono mamalu mo Palauli le Falefa.

**Afioga Hon Leota Laki Lamositele (Minisita mo Tina ma Tamaitai, Atinae o Nuu ma Afioaga ma Agafesootai):** Leai, faafetai. Ua ou tulai atu ma le faaaloalo leaga o lea ua taua foi le vai lea i Sili, e pei la o lea ua outou silafia i i, o se faataitaiga lelei a la lea o le mea e ave i ai lau miliona lea e avatu i lou itumalo. O lona uiga la o le matou vai, ia o se isi la lena atinae o le a tilotilo i ai le matou nuu, aua o le mea foi lena na ala ai ona taofiofi muamua ona o la e vaai foi le matou nuu ma le itumalo po o le a ni faamanuiaga e maua mai ai. Ae o lea la faafetai o lea ua maua atu o lona uiga o matou la lea o le a faataua le vai i fafo. Faafetai.

**Afioga Hon Tapunuu Niko Lee Hang:** Lau Afioga i le Fofoga Fetalai, pe maua se avanoa faamolemole...

**FOFOGA FETALAI:** Ia saunoa mai Tapunuu.

**Afioga Hon Tapunuu Niko Lee Hang:** Faafetai. Leaga o lea sa ou taua le suafa o le Afioga ia Leota i le vai lea i Sili, ae faafetai o lea ua tau faalogo atu o lea o le a tau lau o le faamoemoe. E le gata la i le vai lea e tau produce e maua ai ni suavai taumafa, a o le aoga fesoasoani tele a o le vai lea lau Afioga o le EPC ma le suavai foi lea e faasoa i Salafai, le suavai taumafa lea. O le vai lea ou te talitonu e mafai ona fai uma ai mea ia e 3, a o lea ua tatala mai le finagalo o le Afioga i le Minisita, faafetai Leota. A na e le tulai atu lava ma e alu i le Malo lea ua e i ai, atonu o le a fesoasoani foi le Malo i mea, aua o mea taua ia aemaise Salafai. A fai foi la se vai i ina, ia tau o le Salafai Water. Ma lou faaloalo lava.

**FOFOGA FETALAI:** Ia, se i tulai mai le sui usufono mamalu mo Anoamaa Nu.1 pe i ai se mataupu agai i le Minisita.

**Afioga Alaiasa Moefaauouo Malagaitutogiai Sepulona Moananu:** Faafetai mo le avanoa i lau Afioga i le Fofoga Fetalai. O lea ua logo i logo ā le Maota i le saunoaga matagofie a le Afioga i le Minisita, mai lava i le po anapo, o lea lava ua maleifua mai i lenei taeao le paia o le Maota, ua tatou faalogologo i se... ia te au lava ia i lau faauigaga, o se vision fou mo le tatou atunuu ma le Malo. O lea foi la ua momoli atu le tuualalo a le matou itu, ia o lea lava e saunoa mai le Afioga i le Minisita ua na talia ma le agaga fiafia.

Ia o le agaga faafetai lea. A o lau lava lauga lea na fai i le Tala o le Tupe, o lea ua mafuli le finagalo o le Minisita, o i lea o le a toe lalaga ai le tamaoaiga o Samoa. Ia, a na aumai la ni nai fuainumera foi ia tatou te iloa ai le manaia, ae o le a matou talia.

A o le mea lea ua taua ai Falefa ma Falevao, e leai se mea o le a talanoa ai fua le isi sui usufono i le sui usufono o le itumalo. Ae tutusa lelei maua ma le Afioga ia Leota, o le mea tonu lava lea na tapena ai le matou komiti lea ua ou fai atu ai ua fai le matou komiti e faatalitali mai ai le miliona, o le faiga o le vai o le matou nuu lea o le a ave i fafo. Ia ma le agaga faaloalo. Manuia le saunoaga i lau Afioga i le Minisita...

**Afioga Sulamanaia Fetaiai Tauilili Tuivasa (Vaimauga 1):** Lau Afioga i le Fofoga Fetalai pe maua se avanoa.

**Susuga Hon LAAULI LEUATEA POLATAIVAO FOSI:** Lau Afioga i le Fofoga Fetalai, e leai ma se isi o le aualii lea na lauga i lau Matagaluega alii.

**FOFOGA FETALAI:** Ia, ae taua foi le faatupu manatu i lau Afioga i le Minisita.

Tulai mai le sui usufono mo Vaimauga 1.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai a taua lava se lauga e lagalaga ai foi finagalo ma manatu o le Palemene lenei. Ua avea foi le faaumiumi ona faauilavea i le taua o le saunoaga a le Minisita o lea ua ou tago i lau telefoni o lea ua text mai lou itumalo ona o lea ua taua le suavai o le a mafai ona auina atu foi i fafo. Ia, a o le popolega o lou sui usufono, o lea foi e taatia lau talosaga i le Minisita o le Suavai, leaga o tuamaota o le itumalo lenei o lea e sau ai le vai e ave i le eletise. A o lea la ua ou tago atu ua talosaga mai. O le popolega ne i te i ua ou alu atu nei ua faasa ne i toe oo atu foi lea le Malo e sau ai le suavai lea. A o lea ua ou tatalo atu ai i lou itumalo, leaga o lea ua aumai le tuualalo, ua manaia tele le fuafuaga lea. E te silafia foi o lenei itumalo e 2 suavai tetele lava o lo o sau i tuamaota o Vailele ma le afioaga lenei o Fagalii, o lo o inu atoa ai le atunuu. E 2 foi nuu o le itumalo lenei o Laulii ma Letogo, o lo o inu lava i le vai tumaoti.

O lou fiafiaga la lea i le saunoaga a le Minisita, o le a test matou vai ia e sau lava o le spring water ina ia mafai ona maua ai foi se faamama avega i si ou ia itumalo i le vai o lo o auina atu i fafo. O lou lagona faafetai lena i le lauga a le Afioga i le Minisita.

**FOFOGA FETALAI:** Faafetai i le sui usufono mamalu mai Vaimauga 1.

**Susuga Hon Tuilaepa Fatialofa Auelua Sailele Malielegaoi:** Lau Afioga e i ai le mea fia faasao i le saunoaga lea faatoa maua atu nei.

**FOFOGA FETALAI:** Ia, saunoa lau Afioga.

**Susuga Hon Tuilaepa Fatialofa Auelua Sailele Malielegaoi:** O le mea e fia faasao, e faapefea ona faamuta e se maupaolo le tou vai?

**FOFOGA FETALAI:** Ia tulai mai lau Afioga i le Minista e faaauau le saunoaga.

**Tofa Mauu Siasia Puepuemai (Vaa o Fonoti):** Lau Afioga i le Fofoga Fetalai pe maua se avanoa o lenei itumalo?

**Susuga Hon LAAULILEUATEA POLATAIVAO FOSI:** Ia e faaaloalo tele atu le Vaa o Fonoti.

**FOFOGA FETALAI:** Talofa e i le Vaa o Fonoti. Ia se i onosai mai lau Afioga i le Minisita se i tulai mai le Vaa o Fonoti.

**Tofa Mauu Siaosi Puepuemai (Vaa o Fonoti):** Ia, e le itiiti le agaga faafetai i lenei taeao. Ou te talitonu foi e fou o matou sui usufono i le Palemene ma le Maota o Samoa. O lea foi sa outou faafogafoga le paia o le Maota i sa matou lauga i le usugafono muamua. Ia o lea sa matou mataituina tulaga foi ma taualumaga o le Palemene. Peitai, o lea ua oo mai i lenei taeao, e le faalavelave i le saunoaga a le Afioga i le Minisita.

Talu ai ona o lea ua tatou talanoa i le suavai. Ona o le itumalo lenei o Fagaloa, e i ai foi le isi faaopoopoga i luma atu pe a oo ina faalautele le igoa, Tama o le Vaifagaloa. A outou silasila i le matou itumalo, e tai 4 tai 5 vaitafe o lo o tatafe mai luga o atumauga. O lona uiga, o se itumalo e matua faamanuiaina e le Atua le itumalo lea o Fagaloa. E maea le tatou Fono i le po anapo lau Afioga i le Fofoga Fetalai, ou te taunuu i le fale ua ta le 11. Ou te moe anapo ua ta le 2. E le i momoe le matou itumalo i le tauvalaau mai pea tauvalaau mai pea, “Mauu, o le a se tulaga o le tatou miliona?” Lea la ua atagia i le taeao lenei. Faafetai tele i lau Afioga i le Fofoga Fetalai, le tatou itumalo. Ia lea o le a maua le tatou miliona, faaoga le vai le la, faaigoa loa, O le Vaifagaloa ia o lea o le a faatau ia Samoa ma atunuu i fafo. Faafetai lava i lau Afioga i le Minisita.

**FOFOGA FETALAI:** Ia, o lea ua... ua aoga foi le laga o le vai ua fai atu ai lau lauga i lou itumalo ma...

Tulai mai lau Afioga i le Minisita e faaauau lau saunoaga.

**Susuga Hon LAAULI LEUATEA POLATAIVAO FOSI:** Lau Afioga i le Fofoga Fetalai, se o lea lava e matau ma le totoa, ae tumu tele i le faaaloalo. Ioe. Ave pea le avanoa se i aumai le tofa ma le faautautaga. A na ou le talanoa nei i le vai e le laga mai mea ia. Alu le Aso Lua, Aso Lulu, Aso Tofi, o tetee i le miliona. Ia o lea ua pepese nei i le miliona, sauni o lea fai tatou fale vai. Ioe. E le o le saoga lena o lau tala na fai atu. Ioe. Malilie. Ia, tulou ia Alaiasa lau saunoaga, leaga e Aiga Sa Fenunuivao oe, Aiga Sa Fenunuivao le afioga ia Neioti, ae matua au i le Aiga Sa Fenunuivao. Ioe. Ae aua e te popole, o fasaga lava a le toeaina e tataua ona fai se vai i tua. A ua leva ona lua nonofo i le Malo ae le fai mea ia. Ui o lea, aumai la outou faatuatuaga. O lea foi ua saunoa, e fia foi atu lava Lautafi i tulaga foi o fefaatauaiga, e sao oe, o meataulima, o lavalava ma mea na. O le faamomeoe lena o le Ofisa o Faatoaga fai le faaaliga e faalauiloa uma ai tatou oloa ae ave faatasi uma. Ou te faanoinoi i le Afioga i le Minisita mo Fefaatauaiga, o maua ma te o faatasi e fai tatou trade shows, Niu Sila, Ausetalia, Amerika. Aua foi o i ina e omai nai au fai meataulima ma tagata nei le aufai chips, ma mea uma nei, e faatau, e faatau tatou oloa. E leai se Samoa e le afio ifo. A o le faamoemoe lena. A o le auga atoa lena lau Afioga i le Fofoga Fetalai na avatu ai se manatu.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, ia, o le a faaiu atu ia ia te au mataupu. E ala ona matou tutulai atu, toeitiiti lava tutulai uma atu le itu lenei, o le suamalie o au faamatalaga, ae leai lava ma se isi o matou e talitonu i ai.

**FOFOGA FETALAI:** Ia, ou te manatu lau Afioga i le Minisita, see ese ia ma lea vaega...

**Susuga Hon LAAULI LEUATEA POLATAIVAO FOSI:** Sa ou faapea ua mavae lenei Nofoaiga ma upu ia. Aua o upu lava nei sa e fuea ai ta ita, pepelo, aigagaoi, le talitonu i ai se isi, e leai se isi o le atunuu e toe talitonu ia te oe. A o le a lau silasila mai i lau tu atu? O ai lea ua talitonu i ai le atunuu? Ia o le tala lenei lau Afioga i le Fofoga Fetalai. Leaga ua soo le lalolagi. O a upu ia e fai ia te au? Se ua pupu lota tino. Lau Afioga i le Fofoga Fetalai, o upu ma tala, oka, o le a ou le oo i ai.

E momoli le agaga faafetai, faapitoaugafa e faaiu ai se faafetai muamua o lenei aso, ona o le paia ma le mamalu maualuga o le aufaigaluega a le Malo. Le paia e o tupu ma ee, tamalii ma failauga, faletua ma tausii, saoa ma tamaitai aemaise outou o le aufaigaluega a le Malo. O sa ma faiga, e le vaea is au upu. Ae ona o mea ua tulai mai i le tatou savaliga i lenei Nofoaiga, e tataua lava ona fai atu sou leo.

Le paia e ma le mamalu o Ofisa Sili o Matagaluga, o tatou uma lava o tagata filifilia a Samoa, e tofua tatou ma le faalau e toso, tofua tatou. O le matou lea valaauina o le tou lenei valaauina. Aua ne i galo, e tasi lava le atunuu, o tatou o le aiga. Ae ona o mea ua tulai mai, ua ou manatu e tataua ona faamuta le mea lenei o le tatou o femateai ma fetusilimaai ma tatou o e fai le faiva o le matematega a o tatou alo i le fofoaiga o le Nofoaiga lenei. E le mafai ona tatou tautua i ni Atua se lua. O le filifiliga a Samoa i le Nofoaiga lenei o le Faigamalo lenei e omai e tauave le atunuu. E tofua lava tatou ma lagona. E i ai le aiatatau a le tagata, e i ai lona vatapuia e tosi ai lona finagalo ma lona lagona i le mea e alu e palota i ai ma lagolago i ai. Ae a uma loa le filifiliga a Samoa, ona tatou mautinoa lea ua i ai le tatou valaauina tatou te o e tautua le atunuu. E le faapea ua matou saofafai iinei o matou o le Pati a le Faatuatua i le Atua Samoa ua Tasi, o matou o le Malo filifilia a Samoa i lenei Nofoaiga. It's your Government, your People, your Nation ae le mafai ona tatou o ai faapea, tatou te o e mate mai mate atu.

O le agaga lenei, o lau faaoololomaau foi lenei, le paia e ma le mamalu o le aufaigaluega, ia outou alofagia Samoa ma le tatou valaauina. Aua e i ai le taimi e saofai ai se isi o outou i le Nofoaiga lenei. There will be a time, e saofai ai le tagata ona o lana galuga e fai mo le atunuu. It's not about us, it's about Samoa la e faatalitali mai. Tuu pea le polokiki i le aufai polokiki. Taatia mai pea ia matou. O le a la outou silasila mai? O le a la outou vaai mai i le taeoa lenei? Fusi le fau o Malo. O a mea na tutupu, o a mea na fai, o a mea uma



na felauai ai, o le taeao fou lenei. Na outou faafofoga i le lauga a Tuilaepa anapo? O le mea lene e manaomia. Ua outou faafofoga i faauilavea e fia afe lea na tutu mai nei? O le mea lene o lea e manaomia. Fau faatasi le Malo. Aua o ai? O le Malo o ai? Aua ne i faapea o le Malo... aua o le upu a lea sa masani ai le 45 tausaga talu ai, e tau loa le Malo fai mai, se o mea faitete. A gau lava gau. Don't worry about it. E lau lau lava mea a lea, fue fue le mea a lea, alu. Not anymore. O lau tala lene, ma o lau faaoololomaau foi lene, le paia e ma le mamalu o le aufaigaluega, fai lo outou valaauina. O le tagi lene a le pumate. Ou te le nofonofo i i, e pule le Atua po o le a le umi o au i i.

O lene ua avatu se upu. O le tulaga ma mea ua aafia, talofa e. Lea ua ou fai atu, e momomo le loto. Aisea? Ua aafia e na aafia ona o le milomiloga faapolokiki. Tulou lava le aafia o le sa avea ma Loia Sili, le sa avea ma Failautusi o le Fono. Aisea? Tu le tagata i lona tulaga e faatino ona tiute. Aua ne i vaai po o fea e au i ai. Tuu i le Tulafono. That's the law tatou omai e fai. O la'u tuualalo lene le paia e, afai e paopapa sau upu, ia outou alofagia. As of today, o lau upu lene na ou manao e fai atu, malie lo outou finagalo, o le tatou Malo it's your Government, the Government of the Day. Lea ua tulai ai le Afioga i le Sao Faapito e fai ma uluai Palemia tamaitai o le atunuu.

Ia, le paia e o le tatou aiga le Faatuatua i le Atua Samoa ua Tasi, e momoli le agaga faafetai, e le lilo i lalo e le lanu lo tatou taunuu mai i lenei taeao i totonu o le Maota o le atunuu. Faafetai tele i lo outou onosai ma le faapalepale i taimi uma ma galugalu na tatou asa mai ai le tatou faamoemoe. Ma e le ufitia faamanuiti lau Afioga Dr. Valasi Luapitofanua Asiata Selesele, o oe o le Taitai o le SNDP ma le tama matua ia Tea Peato, vaeane le Afioga ia Papalii Titi Malietoa Tanumafili le II, Papalii Malietoa ma Vui Masina. Leaga o tatou ia na tatou omai tatou te tutu faatasi e fai le mea lea, tasi le loto, tasi le fatu, tasi le talitonuga, sailimalo mo Samoa. E le mafai ona galo, e le ufiufia foi. A o le agaga faafetai lene ua fai atu.

O lona lua o au faafetai lau Afioga i le Fofoga Fetalai...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e mafai ona fautua atu, lauga mai ia matou ae le o lou toe lauga i o i lau vaega.

**Susuga Hon LAAULI LEUATEA POLATAIVAO FOSI:** Ia, o lea e... I will come back to you later. I will, definitely I will. E le mafai ona galo, Valasi, leaga na tatou auga loa o le a fai le faamomoe lene, lea ua tini i le aso, faafetai.

E momoli le agaga faafetai tele i lenei taeao, e le gafataulimaina i sau upu lau Afioga i le Sao Faapito Fiame. Ia viia le Alii. Faafetai tele i lou onosai i nei taimi uma, faafetai i lou talitiga, faafetai lou lototele, faafetai i lau silasila ia Samoa ia toa le atunuu. E le o oe o se tagata faataatia na lalafo ai nei upu ma tala. Faafetai i lou toatai, faafetai i lou manatu ia Samoa. Faafetai i lou

silasila i lou manatu i lou aiga lea. E 26 itumalo na filitagaga e filifili oe e fai ma Taitai o Samoa i lenei vaitau. Viia le Atua. O le tatalo, ia maua lou soifua manuia. Ma o le anava lava a le tatou aiga, onosai, lototele.

Lau Afioga i le Sui Palemia Tuala, talofa e. O oe sa faatali i ai le filiga a Samoa po o le a le mea e tupu. Faafetai i le tofa a Satuala. Ua e le vaai i le lauamanu ae ua e silasila i le mulioatu. Na matou faatali po o fea e aga i ai lau faaiuga, ae na ou lototele, leaga sa uma ona ta faiupu. Tuala, e le tau selu atu. Faafetai. Sa faatali uma le 25 lea o lou aiga po o fea e agai i ai le faamoemoe. Ae viia le Atua, a lena ua e afio i lou nofoa vaevaeloloa, le nofoa ua leva ona laulauvivilu i ai isi e fia oo i ai. Ae a? Filifili oe e le Atua.

O lou itumalo pei ona saunoa le Afioga i Sala ananafi, amuia lou itumalo ua 2 sui usufono. Amuia oe. Ae a? Matamata fua Saleaula. Tulou le faafofoga mai a le Matua ia Saleaula. O le Tulafono lea na ou alu ese ai. Tuala, o le Tulafono lea o le aveesega o le Nofoa o Saleaula. Malie, fai se fuafuaga ma e lagolago mai i si au mau, toe faafoi le tofi o Gagaemauga Nu.2, ina ia i ai se leo o Vaituutu i le Maota. Ua a nei? Ua leai se tootoo o Saleaula i le Maota. O i ina na ou finau ai ma ou tulai ma ou alu ese ona o le mataupu lea. Ia manuia lou alofaiva.

Ia, ou uso pele, Olo ma Leatinuu, e le galo le tatou savaliga. Ua ou faalogo i le saunoaga a le sui usufono o le Vaa o Fonoti, ua sui lou suafa. Oka se faautautaga ina a tatau. A lea ua tatou vaai i ai? Malo le onosai ma faapalepale. Leatinuu, o lea lava ou te tu ma ou tilotilo i le tatou Nofoa toafa le la, le tatou Nofoa le la, e aasa i taimi uma o le aso, ioe. E faatusaina tatou e toatolu ia Sataraka, Mesako ma Apeteniko. Na a? Viia le Atua i Lona alofa ma Lona agalelei. Ua a nei? Olo, faafetai i lou fusu toatasi. A na onosai lava Leala e te lua nonofo i o, faapenei o lea e saofai i i. Ioe. Ae malo faafetai.

**Tofa Lealailepule Rimoni Aiafi:** Lau Afioga i le Fofoga Fetalai, tatou o e inu le tatou ti.

**FOFOGA FETALAI:** Ia, na o se fesoasoani atu i lau Afioga i le Minisita. Faauma maia lau... taatia ia le tatou Vaega Faaupufai ae tatou o i le fonu a le Palemene.

**Susuga Hon LAAULI LEUATEA POLATAIVAO FOSI:** Faafetai. Ia, le paia e o tatou itumalo uma e 26, e momoli le agaga faafetai o lea ua atoatagi le paia ma le filifiliga a Samoa. Faafetai i le manatu o le tatou aiga, ae le gata foi i lea o tatou aiga e 54 na o i le faiga filifiliga, ia viia le Alii. O lea foi ua tatou toe sauni e fai le faiga palota, ia, e i ai nisi o itumalo e toa-7 lea ua aveese ma le lisi lau Afioga i le Fofoga Fetalai. Aleipata Itupa i Lalo, Sagaga 2, Sagaga 4, Aana Alofi 2, Safata 2, Falealili 2 ma Falealupo, e 7 itumalo. Ia o lea ua outou faafofoga mai i lou leo, o lea ua faatali atu lou Malo ma le tou tai miliona e atinae ai outou. E le o se upu e aveane ai leaga

o lea e le o i ai se leo o itumalo na. Ou te toe savali atu foi e faaleo lagona ma manatu. O lea ua sii le penisione, pau le pili o le vai ma le eletise, maua le penisione \$200, maua le penisione mo e puapuagatia. Ia o le agaga lena lau Afioga.

Ia, e le faagaloina lou uso a Minisita Lagolago ia Vaele. Vaele, o lo ta itumalo e sootuli. O Gagaifomauga 1, 2, 3 o le aiga. Ia e matau ma vaai i le mea e agai i ai le ta sapelu, tulou le Maota, o gaoioiga uma e agai i ai. Aua ne i galo, o au nei, a o oe taeao.

Ia, lou itumalo pele, toe tasi lava lea lau Afioga i le Fofoga Fetalai, le paia o le Aiga Sa Tupua ma Aiga Sa Malietoa ma le mamalu i le faletolu. Faafetai tatalo, faafetai i lo outou tapuai mai i ou tama faaleagaga uma, e mai Malaefilogia seia paia Vaalepu ma Masinaafiafi. Faafetai i la outou tatalo ma lo outou tapuai mai ma lo outou talitonuga na aumai ia te au ou te sau e fai le galuega. O lou lotu usitai mo le tatou aiga, lea ua faatino uma a mea na outou finagalo i ai. O lea ua outou finagalo i le Afioga i le Fofoga Fetalai, o lea ua fai. Ua outou finagalo i le Palemia, lea ua fai. Ua outou finagalo i le Sui Palemia, o lea ua fai. O tatou, e le o ni tagata tautua fia matai. Leaga o le upu lena o lea sa faalagi i le Maota. E ala ona alu Laauli o le fia Palemia. E fia taitai. Fai uma mea na. Ae le o le agaga lena o le itumalo lenei.

Faafetai i le tatalo i le paia o Sao e Fa, Leasi ma Togoiu ma Vagana ma Polataivao, lo outou faletolu aua Saitupua, Salealiifano ma Saletolo. Viia le Atua ona o lo outou alofa ma lo outou agalelei. Tapuai mai ma le manuia e ae manuia ai faiva o la outou auauna. O a tatou lagolago uma le lalolagi atoa, o outou nei sa faia le faiva alofilima e tautua ai le tatou aiga aua le faamoemoe. Faafetai le tatalo, faafetai le lagolago mai. Faafetai mo mea uma.

Le tatou itupa o loia, e le galo la outou galuega. Le Afioga ia Mauga Precious, Milo Lui, Taulapapa Brenda, Namulauulu Matafeo ma le vasega o loia o e sa galulue i le tauavameaina o le tatou faamoemoe.

E faaii sau upu i Taitai o Ekalesia uma i le atunuu. Faafetai le tatalo ia te outou tama o le Ekalesia, ua outou le nofoai ae ua outou omai e fofu alamea le mataupu. A lea ua tilotilo i ataata o tauleleia i lenei taeao ua ae ma le manuia faamoemoega uma o le tatou aiga. Faafetai tatalo.

E faapitoaugafa le tala i le Ekalesia EFKS ma le tatou TV EFKS, na o le pau lenei o le alaleo na faataga ai matou e tau ai le taua ma le faamoemoe. Faafetai i lau Afioga i le Taitaifono Sili ma le Laulau a Fono a le Ekalesia. Aua tou te popole, o le mau na avatu muamua, e fai, o lafoga a faifeau e aveese.

Ia faaii sau tala i ou aiga, o ou itu taulagi ma tagata uma ou te tau i ai i le atunuu. Faafetai i lo outou onosai, faafetai i mea uma i lo outou lagolago mai. Viia le Alii i lo outou soifua auauna ma lo outou lagona o le mataupu lea ta te fai atu ai. Viia le Atua i mea uma ma le faamoemoega o le tatou savaliga.

Ia, ona foi mai lea o sau tala i si ou toalua ma si au fanau, mum, I love you with all my heart. Malo lou onosai. O lou fatu lea e tata ai lou fatu, o upu moni, upu tautino. O le tagata e tutu i ou tua i le taimi e tafetotoi ai ou tino, Mea uma na savali ai. Thank you, from the bottom of my heart. O lau fanau, onosai, tou te inu i ai, a ou le inu, tou te inu. O le upu lena.

Le paia e ma le maualuga, ia foi mai sau tala. Le Palemene o Samoa, ia ua uma a tatou upu, e ui ina ou faalogologo atu ua laulau mai lo outou mafatia ua outou laina, e le galo lenei mea ua tupu. Ia ae onosai, o lea ua tatou sekueli paleni. Na o le tasi lava le aso na outou faalala ai, a o au e 7 tausaga o feagai ma le faamasinoga ma Peseta, o le sailiga o le amiotonu ma le mea e fai. Ua a nei? Ia lea ua outou silasila mai, ua mavae atuvasa o le fefulituaaiga ma le tatou le femalamalamaai, a o lau upu mulimuli, aumaia le alofa e fai ma fusi o le feagaiga lea ua osi i le taeao lenei. O le Maota e lapotopoto, o le alafa, faasaga atu le Fofoga Fetalai, faasaga mai, faasaga mai faasaga atu. Fai lena ma fua taualuga o le tatou faamoemoe.

Alofagia e le Atua le tapuaiga a Samoa i ona tulaga faalupe, ia tumau le manuia i luga o le tatou atunuu...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, pe mafai ona ou faatuina se lafo, *E toe faaopoopo se isi itula.*

**Susuga Hon LAAULILEUATEA POLATAIVAO FOSI:** Leai, aua, lea ua uma. O lau mea masani lava, o lou leai i taimi uma e faaopoopo ai lau lauga. Ia, faatai sou leo le paia maualuga ma le faafofoga a Samoa i lenei aso, matou alolofa atu. Maua le soifua manuia i lau Afioga i le Fofoga Fetalai aemaise foi ma le paia ma le mamalu maualuga ua tatou faatasi i lenei aso, ae maua sou ola i le alofa o le Atua. Soifua.

*Na faaalua le agaga fiafia o le Maota i le patipati o latou aao i le maea ai o le Saunoaga Talifuaitau a le Afioga i le Minisita mo Faatoaga ma Faigafaiva.*

**FOFOGA FETALAI:** Ia, malo faafetai saunoa i lau Afioga i le Minisita mo Faatoaga ma Faigafaiva, o lea foi ua faafogafoga ma le totoa le paia o le Maota aemaise foi o le atunuu ma le itumalo, o lea lava ua afu a lau saunoaga, aemaise foi o le taumafaiga o le Matagaluega ua e tulai mai ai. O le mea lea, faamalo faafetai. O lea ua manino mea uma. E talitonu foi o lea ua avatu le fautuaga a lea itu o le malu, ia o ai lava o le manuia o le atunuu. O le mea lea, o mama na lau Afioga i le Minisita.

O lea ua tatou taunuu mai i le tatou malologa. Oi, ua tea le tatou malologa. Ae ui i lea, o le a faaauau le tatou malologa. O lea ou te faasilasila atu ua

faataatiaese nei taualumaga a le Fono Aoaofa Faitulafono mo lana malologa masani o le taeao.

*Na faataatiaese Taualumaga a le Fono Aoaofa Faitulafono mo lana malologa masani i le itula e 11:10 i le taeao ma toe faaauau i le itula e 11:50 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.*

**FOFOGA FETALAI:** Ou te faasilasila atu ua toe amatalia nei Taualumaga o le Fono Aoaofa Faitulafono.

I le toe taliu mai ai o le tatou malologa, e talitonu ua maua se faasiligamalosi, ua tali le sua a le paia o le Palemene, ia tatou faafetaia le Atua i Lana foai i lenei aso.

E faataatiaese Taualumaga mo le malologa o le taeao ua maea saunoa le Minisita mo Faatoaga ma Faigafaiva.

Ma o lea ua oo atu le faasologa i le Afioga i le Minisita o Galuega, Felauaiga ma Atinae Esee, lau Afioga Olo Fiti Afoa Vaai. Ia, tulai maia lau Afioga e te saunoa e talifuaiteu i mataupu sa laga e le Maota. Tulai mai lau Afioga.

**Tofa Hon OLO FITI AFOA VAAI (Salega 2):** Faafetai i lau Afioga i le Fofoga Fetalai. E talitonu foi ua maea palegaauau le taliga o le sua i lau Afioga ma le mamalu o le Maota nei. E momoli atu ai le faafetai i lau Afioga, aemaise foi o le tapenaga a lou Ofisa mamalu.

Ia, faafetai foi i lau Afioga ua maua se avanoa se i tau avatu ai se tali e tusa ai ma finagalo faaalua o le mamalu o sui usufono o le Palemene e pei ona tatou i ai i lenei taeao fou.

Lau Afioga e manatu o lea ua talamatataia le siu o muliaau i lau faausugasega i le taeao ua sola, sa tatou aami faatasi ai le Agaga Paia e taiala ai le tatou galuega, aemaise foi o le faatonufoalua o tatou tiute e tusa ai ma lo tatou valaauina.

Ae o se faafetai foi e le lanu, e le lava i Lona alofa ma Lona agalelei ua taitai mai ai lo outou soifua ma so matou ola. Aua o le upu moni lava, sa tau pale i vaalelea le tatou folauga, a o lenei ua tuta i avamagalo nai Salemuiliaga le sa o Sa Tunumafono ma le Alataua i Lona agalelei. Faamalo pale, faamalo foi folau.

O paia ma mamalu o Samoa i ou itu taulagi ma ou itu faalupea, paia faale-Malo, paia foi faale-Ekalesia, paia foi faale-Atunuu, ia o le a taoto ia faagalu

o le loloto, aua o penina tautele e tofugata i sa matou tala. E loloto foi le moana lau Afioga i le Fofoga Fetalai, ae ua iloga lava ona matapuna.

Lau Afioga i le Fofoga Fetalai, a o le i faatino se auaunaga a lou nei tagata faatauavaa e tusa ai foi ma mataupu laga, ou te muai faatalofa atu i lau Afioga i le Fofoga Fetalai, ae tainane foi le mamalu ua sasao nei, i le afio o lau Afioga i le Palemia, ua faamalo le faatoatoa i lau Afioga. Ia tatou tatalo faatasi i le Atua e faapena ona faaaupegaina lau Afioga aua le taitaiga o le tatou Malo. E faapena foil au Afioga i le Sui Palemia, ia i ai pea le tofa i lau Afioga e faapena ona e lagolago ai i le Afioga i le Palemia i lo oulua sa seelua.

Lau Afioga i le Taitai o le Itu Agai, ou te le selu atu i lau Afioga. E ui lava ua agai atu i lena Itu, ae tu matila lava lau Afioga i lou sao taua i totonu o le atunuu lenei, e le tau faailoina, e le tau faamatalaina. O upu moni, ua tele galuega lelei ua e faatino i lalo o lau taitaiga. Ia atonu foi o lea ua e afio mai lena Itu, ou te talitonu e le muta ai lou agaga alofa i le atunuu e tusa ai ma metotia ma taiala o lo o feagai ma lau Afioga. E le faagaloina lava ia te au i lou oo mai i le tausaga 2006, ma e tatau lava ona ou talanoa and I have to admit this i le faafogafoga a le tatou Palemene faapea foi le mamalu o le tatou atunuu. Tui, you were my mentor, political mentor. E tele mea lelei ua ou maua mai lau Afioga i lou tomā faapolokiki. O le meaalofa lena ou te iloa lava e toatele lena itu latou te le i maua, ae ou te iloa o lea e ia te au le meaalofa lena. Ia, tau ina faamanuia le Atua i lau Afioga mo le tulai mai i lena Itu e Agaia le tatou Malo.

E faamauiina lava le agaga fiafia i le faagasologa o le tatou Fonotaga mai lava i le Aso Gafua seia paia mai lenei aso, ou te faafetai faapitoa atu ai i lau Afioga i le Palemia ia ma lau Afioga foi i le Taitai o le Itu Agai. Ua taotolua lava lua tofa i le faaaliga o taofi i totonu o le Maota lenei. Ma ou te faaamua lava, faaamua lava, aemaise lava ia outou Afioga ua outou sagai mai nei i le Itu Agai, i le lava o outou taimi tou te sausaunoa ai e aunoa ma ni faauilavea. Ia o ita nei, a umi sau lauga o le 11 minute i le faauilavea. Peitai, o se vaaiga matagofie lenei i le tuusaunoaina o faaaliga o tou finagalo, ua matagofie. Aisea? Aua e amanaia outou finagalo, e amanaia foi le tofa a itumalo taitasi. Ia, e talitonu lava o le a tatou alu ai faapena. Aua a manino le aumaiga o mataupu, e faapena foi ona tali le tatou faigamalo, e manino foi.

Ia, ona ou oo mai lea se i taumafai e talitali atu outou finagalo sa faaalua. E le umi foi. Afai o lea ua e... e 5 vaiaso talu ona ou Minisita i Galuega, e 5 foi minute o lau tali atu. Ae se i tau umiutu atu ona outou toe saunoa mai lea. O ai lava le sui usufono o le a faauilavea lau Afioga i le Sui Minisita, kolosi e le i ai i totonu o le lisi.

O le upu moni lau Afioga i le Fofoga Fetalai i le tulaga o auala, auala e tasi ia mataupu ou te lagalaga mai pea lava pea lava pea i tausaga uma. Ia lea foi la ua lagalaga mai. E leai lava ma se faasea e sese, e leai foi ni talosaga o

sese. E pei ona outou fesiligia ai le tulaga, faataitaiga; e le umi lava ona faata auala ae toe malepelepe. Ia pe o atu foi konekarate, e faata atu lava o le patupatu, o le omoomo, e faata ai lava faapena. O lea lava ua outou molimauina. Ia, o le isi foi itu, e faafia ma faafia ona faaleleia auala o le isi vaega o le atunuu ae o la e le i oo se faaleleiga o le auala i isi vaega o le atunuu. Ua leva ona ou matauina le vaega lena.

Ia o le isi lava mea lea ou te vaai atu ai nei, ou te iloa e ioe outou finagalo i sou manatu, o le mea lea o le uma ona faata ona taatitia ai lava lea, tulou le Maota, e le toe salua eseese le maamaa foi lele ua taei uma ai tioata o taavale.

Ma o tulaga uma ia a outou Afioga, lau Afioga i le Fofoga Fetalai ma le mamalu o le Maota, o le a ou mataitu tulaga uma nei. Ou te le alo foi i lalo o se ata o se niu. E i ai foi faasea e oo mai i le Matagaluega po o le Faalapotopotoga lea a le LTA i le matou foi pitolaau i Inspectors e oo atu e asiasi tulaga o le fausiaina o auala, pe o faamaoni, pe le o faamaoni. E pei ona ou fai atu a outou Afioga, o le a ou matua mataitu tulaga uma ia. Ia, a na faapea ou te tali atu nei taitasi, lona uiga tatou te tau taeao o ou tali atu.

Ae i a outou Afioga, ia outou lavapapale mai, e le mafai ona ou tali atu i pe leai ae ou te le i alu atu e asiasi atu auala e pei ona outou finagalo i ai. Ma o le tulaga foi lena o le a taatia le polokalame, e tatou te feiloai lava i tulaga o auala e pei ona talosagaina mai.

E faapena foi i auala galue. O lenei faamoemoe lau Afioga i le Fofoga Fetalai e pei ona faataoto mai foi i le faigamalo talu ai, e le o se faamoemoe itiiti, o se atinae e taua i le tatou atunuu. Paga lea lau Afioga i le Fofoga Fetalai, ua tatou matauina, ua sioki le talo, pei ona saunoa le Afioga i le Minisita o Faatoaga. Ua tatou matauina o isi nuu i tua ma Savaii, ua faatau talo mai le isi nuu i le isi nuu. O le a la le uiga o lea mea? O lo o i ai lava le tatou faatamala i lo tatou galulue ma faaoga lelei atinae ia o le tatou Malo. Masalo foi ua galo, o au foi ua ou ofo i tupe faaalu a le tatou Malo i ala galue, e le i lalo mai o le \$10 miliona. A faafofoga mai la le mamalu o le tatou atunuu, e le o ni tamai tupe tupe ia e avatu e amatamea ai le atinaeina o le soifua o tatou tagata. Ma e ao lava i le mamalu o le tatou atunuu ona faaoga tatau faamoemoe o le Malo ina ia fanafanau mai tupe ia e faaleleia ai tatou ala galue e ala i outou soifua atiae i faatoaga. Ma e faapena foi se vaai a au nei ma le Matagaluega, e le faapea o le a talosaga mai ma faata. O lea o le a alu atu foi le matou asiasiga. Ma o le alaafaga lava ma le nuu o lo o galulue i a latou faatoaga, ia o le a faapena ona ave i ai le faamuamua. Ae afai e le o faaoga lelei le atinae lea, ia ou te le tau fai atu.

Ae lau Afioga i le Fofoga Fetalai, e pei ona ou fai atu i tulaga o auala galue ma auala o le Malo ma auala taloto i totonu o tatou alaafaga, ia o le a taoto mai, o le a faia se asiasiga, ona tatou faasoia loa lea i se seleni o lo o mafai ona tuuina mai e le Ofisa o Tupe.

Ona tatou oo mai lea i le talosaga i suavai taumafa, o lea ua ou faamauina, lea foi ua manino i le saunoaga a le Afioga i le Minisita o Faatoaga nisi o

vaega. Ae o se matou tala i le tulaga sa laga mai e se tasi o sui usufono le tulaga o vai tumaoti, e moni. O le tele ia o faafitauli i le tulaga o vai tumaoti. O le mea moni lava tulou le Maota, e le o ni vai mama mo le taumafa e le mamalu o le atunuu. Faafetai o lea ua i ai le agaga, ua ou maua foi faamaumauga a le Matagaluega, o lea ua amata ina agai mai i le vai o le tatou Malo i lalo o le Pulega o le Suavai. Ma e sili foi lena, e le gata o le mama, ia lelei mo le soifua maloloina, e le faapea foi e taugata tele o lea ua outou faafofoga, o le a i ai foi le tulaga i le faapau i lalo o le tau o le suavai ina ia gafatia.

Ia e ao foi ona ou toe tau faamanatu atu e i ai ia le tatou Tulafono ua uma ona pasia i mea tau suavai, vaitafe, vaipuna, vai uma lava na ia mo le silafia e a outou Afioga o lo o tau fuafua ia so outou Kamupani Vai, ia o vai uma na o lo o i lalo o le vaaiga a lo tatou Malo. E avatu la ia te au ia le faatagana e fai ai, ia ona faatoa fai lea o ni tou kamupani faguvai. Ia e pei o nisi na o vaega o tulaga o suavai.

Ia ona oo mai lea i i le Malosi Faaletise. Ia e i ai nisi ua laga mai ia le tulaga o mea ia o tatou smart meters. O le upu moni lava o au le isi tagata sa faasea i le smart meter. Ae ina ua ou taunuu mai, ua ou malamalama uma i le tulaga o le faaaogaina o le smart meter. Ma e ou te iloa lava o se tulaga a le o se lape o se lape i le faamalamalamaina o le aoga o lea foi atinae. Ae ou te iloa lava a manino mea uma, ia ona lelei lea ma malamalama ia lo tatou atunuu i le tulaga o smart meter.

O smart meter o le tulaga o le faigofie, faigofie lona faaaogaina. Ma e lelei foi ia le tulaga lea, e mataituina ai le tulaga o le faasolitulafono o le faaaogaina o le eletise. O le tasi lena o vaega lelei. O le isi tulaga o lo o galulue ai nei ia le Matagaluega, o le faalapopotoga, o le taumafai lea ia i ai se fesootaiga o tatou Matagaluega e ala i le smart meter ia mo tatou aiga o lo o papaaao i nuu e mamao e fesoasoani mai i le togitogiina pe top up mai ai ia le tatou eletise. Ia e na o le tau lava i ai o le numera, ia top up mai lava po o Niu Sila po o Ausetalia po o Amerika lea foi mea, fesoasoani mai ai i lo tatou limavaivai.

Ia o le tulaga e pei ona... e pei foi ona outou faafofoga ma molimauina ia le 20% lea o le a faapau i le tau o le tatou eletise. Na ou taunuu mai loa amata ia le matou galuega ma lau Sector atoa. O lau tatalo lea i Faauluuluga o Matagaluega, faamolemole ia outou Afioga, ou te fia tautala i ni mea fou ni idea fou i totonu o le Palemene. Aua o le mea lava lea e 15 tausaga o ou vaai pea ao ou i ai i totonu o Komiti Faapalemene o Galuega Tetele a le Malo, e ta te vaai lava i ai, o mea masani lava. O le sii i luga o le toe pau mai i lalo, sii le diesel sii i luga, ae e leai lava se tulaga foi lea ua i ai ai se siitiaga fou i le tulaga lena.

Saunoa le Afioga i le Taitai o le Itu Agai i le tulaga o le o faatasi o le Social Development ia ma le tamaoaiga, ou ataata lemu lava lea. Aua o lana aoga lea sa fai mai ia te au i le taimi o ou tu mai i ina. Ae e fia lauga loa so o se



Tulafono po o le a, ia e muamua ona e tilotilo i le lelei o le atunuu faatasi ai ma le tamaoaiga o le atunuu e o faatasi mea e lua na. Ia ou sau loa faataitai i le mea lea. Ae uma ona matou talanoa i le EPC, o se mea lelei.

Lau Afioga i le Fofoga Fetalai, o lea idea po o lea faiga fou, sa matou tilotilo i le tulaga foi lea, a faapau i lalo le eletise, ua increase le demand o le faaaogaina o le eletise. O le a mafai ona gafatia e le mamalu o le atunuu, ia le tau o le eletise. O aiga e le i ai ni pusaaisa tulou, o le a gafatia le aumaia o pusaaida i o latou aiga. Taumamafa i vaimalulu, teu ai ni taumafa o totoe i lea aso ma lea aso.

O lona lau Afioga i le Fofoga Fetalai, a increase le usage, increase le revenue a le Matagaluega le economy. O i ina e paleni ai le economic wellbeing ma le quality life o tatou tagata. Ia ona o tatou foi lava lea i ai. Tatou te toe foi lava i le tulaga lena.

Ia o i i le atinae lea i Alaoa e pei ona laga mai e le Afioga ia...

**Afioga Lupematasila Galumalemana Tologata Togia Tile Leia (Falelatai ma Samatau):** Lau Afioga i le Fofoga Fetalai, pe maua se avanoa...

**FOFOGA FETALAI:** Fai mai sina malologa a lau Afioga i le Minisita, tuu atu le avanoa i le sui usufono o Falelatai ma Samatau.

**Afioga Lupematasila Galumalemana Tologata Togia Tile Leia:** Faafetai i lau Afioga i le Fofoga Fetalai mo le avanoa, e leai foi se manatu e faalavelave i le saunoaga matagofie a le Minisita. Ia ae ona o le taua tele o nai mataupu e pei ona maua i le saunoaga a le Afioga i le Minisita, o lea foi e tutulai atu ai e avatu ai se tuualalo.

E momoli atu le faafetai tele, o se fuafuaga lelei tele le faataugofieina o le eletise, aua e pei lava ona silafia, e le o i ai lava se isi e le o mananao ina ia taugofie ia le tau o le eletise. Ia o lea foi ua faamalamalama mai ia itu taua e alu i luga ia le faaaoga, ma maua ai foi tupe e tele a le Matagaluega. Na pau lava le isi vaega e tatau ona seu silasila foi i ai, a faateleina le manaomia o le eletise, o lona uiga e vave ona o atou manaomia nisi afi e gaosi ai le eletise.

Ia ma le isi vaega e tatau ona silasila totoa i ai, o le taimi e manaomia ai le eletise aua o le tasi lea vaega e taua tele. E pei ona i ai ia le eseese o le motu o Upolu ma le motu i Savaii. O le motu o Savaii e i ai pea i le tulaga sa i ai ia le motu o Upolu i le 20 tausaga talu ai. O le taimi e maualuga ai le manaomia o le faaaoga o le eletise, ia o le afiafi e amata atu i le 7:00 le 10:00 i le po. Ia ae a maea le taimi na, ona matua pau maualalo lava lea o le manaomia o le eletise.

O le eseese lena o Savaii ma Upolu. O Upolu nei, o lea ua amata atu lava i le ta o le 8:00, ona ae i luga le manaomia o le eletise. Ua toetiiti lava tutusa ia le manaomia o le eletise i le faagasologa o le aso ia ma le taimi lea o le po

ina ua manava atu galuega. O le taua tele ia nai vaega ia e tuutuu atu ai le fautuaga ma le tuualalo i le Afioga i le Minisita e seu silasila i vaega ia.

Ia ma le isi tulaga e pei ona taua i le taimi ua sola, ia o lea ua tuuaititia ia le CSO, o le tulaga lea e fesoasoani ai le Malo i Faalapotopotoga Tumaoti, ina ia mafai ona faaauau atu ia le tautua ma le auaunaga, i le vaega o le atunuu e limavaivai, latou te le gafataulimaina ia le totogiina o le toso atu o le eletise. Ia ma le isi vaega taua, sa ou tau tu atu lava aneleila ina ua talanoa le mataupu i suavai. Ae ou te iloa o lea ua maua le avanoa e avatu ai foi ia le tuualalo ma le fautuaga i lo tatou Malo, ia o le eletise e gaosi mai i le suavai, o le eletise ua mautinoa, o le eletise faafouina mautinoa, talafeagai ma lelei mo Samoa. E le gata e le faaleagaina ai le sioisomaga, ae pito sili atu ona taugofie.

E pei ona maua i saunoaga a nisi o sui usufono i le taimi ua sola, ua fia sefulu tausaga o taumafai ia lo tatou Malo, ina ia atinae nisi o vaitafe o lo o faamanuia ai nisi o alalafaga ma isi afioaga. Peitai e oo mai i le taimi nei, e le i mafai. Ia o le tasi lena lui i le tou Malo fou ua tulai mai, o lena foi ua sui mai ia sui usufono i afioaga e pei ona faafaigata le faaaogaina o suavai, ia atonu o se fesoasoani sili lea. O le a mafai ona fesoasoani e le gata i le gaosia o le eletise e gafataulimaina, ia ae faaititia ai foi le faaleagaina o le osone, ia ma le tatou siosiomaga.

Ia o le soso atu lea ma le agaga faaaloalo.

**FOFOGA FETALAI:** Ia faafetai, o lea ua maua le fautuaga, ia o lo o faafofoga mai...

**Afioga Hon Tapunuu Niko Lee Hang:** Lau Afioga i le Fofoga Fetalai...

**FOFOGA FETALAI:** Ia tulai mai i luga i le sui usufono mamalu.

**Afioga Hon Tapunuu Niko Lee Hang:** Faafetai mo le avanoa, ia e le fia faalavelaveina foi le saunoaga matagofie a le Afioga ia Olo o le Alofa. Ae o lou tulai atu lau Afioga, ona sa le maua se taimi i lau lauga i mea la ia faapea o le a toe maua matou avanoa.

Ia o le tatalo lena i lau Afioga ia ae o lau fesili ona ua saunoa Olo i galuega ia o auala, ia o lou tulai mai foi i tofiga lea ua see mai ai ia lou uso ia Olo, o le mea foi lea sa ou faia. Sa fautuaina lava ia le Matagaluega, ina ia vaai tulaga ia o auala, e le umi ae malepelepe. Ma e tele taimi lau Afioga sa amia ai e le Afioga i le Palemia i na vaitaimi ia konekarate.

Ua tele ia fautuaga na ave i nei konekarate, ia atonu o lea o le a feagai Olo ma... atonu o le a faalogo i ai konekarate, O le tele lava o taimi lau Afioga e alu atu lava le asiasiga e le lelei lava le faiga ae o la foi e i ai inisia ma tulaga faapena, o latou e aumaia le fautuaga. Ia ona alu lava lea i tulaga o faiga o faatinoga i tulaga la ia e taaititia ai mea o faatinoga o galuega.

Ia la e sa faamoemoe la ia le Kapeneta e le gata i le Matagaluega, ae ua i ai foi ia le Board of Directors o le latou galuega foi lena e soosoo tauau ma le Matagaluega e faatino le assess ina ma le suesueina o galuega ia e faaletonu. Ae faafetai o lea ua e tulai mai ma o le a ave ai lau faamuamua. O le isi mataupu lea sa faigata tele lima tausaga o taumafai lava, ae e le o lelei lava ona faatino.

O lea la lau Afioga i le Fofoga Fetalai, ua i ai konekarate ua blacklist e le Matagaluega ona o le tulaga lea o le performance sa le lelei. Ia ae leaga la ua faamuta ia le matou... mea sa matou... ia ae e le afaina o lea ua see mai foi ua pau se toa ae toe tulai mai se isi toa.

Ae o lau faafetai lena i le Afioga i le Minisita, o lea ua toe faamanatu faamalamalama mai le faatauaina o tulaga ia, ma o le a tagai i ai lana Afioga, ma o Olo foi o le inisia auala. O le mea la lea ou te le popole ai, o la e i ai le faailoga inisia auala, ae o au e leai se faailoga inisia. O le mea lea faafetai Olo ua e tulai mai.

O le isi la mataupu pe a maua pea se avanoa, leaga o lea ou te follow lava i lau saunoaga e maua ia le matou tai 15 minute, ae leaga la o saunoaga a Minisita, e i ai la mea sa fia laga...

**FOFOGA FETALAI:** E faamalie atu i le sui usufono mamalu, o le 15 minute pe a auiliili tatou Tala o le Tupe.

**Afioga Hon Tapunuu Niko Lee Hang:** E pei o le tulaga lena leaga e le i uma lau lauga.

**FOFOGA FETALAI:** Faauma maia lau fautuaga, e taua foi ae o lou 15 minute faatoa fai pe a auiliili ia le tatou Tala o le Tupe.

**Afioga Hon Tapunuu Niko Lee Hang:** E i ai la lau fesili faamolemole i le tulaga lea mai i le... leaga o lea o le a talanoa i mea taitasi, ae a faataga mai e lau Afioga, e puupuu lava le fesili.

O le tulaga lea ua tipi le CSO \$4 miliona i le \$2 miliona. Ae o le faamatalaga na aumai ia te au, e \$3 miliona e alu e totogi ai ia tatou moli auala. Ia faafefea la ona tipi le \$2 miliona e manaomia le \$3 miliona, taatia atu e fai ai sau vavega. Ia ma le faaaloalo lava.

**FOFOGA FETALAI:** Faafetai, ia o lea ua maua le fautuaga.

**Afioga Fepuleai Faasavalu Faimata Sua (Salega 1):** Faamolemole lau Afioga e fia maua se avanoa...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai....

**FOFOGA FETALAI:** Onosai mai lava lau Afioga i le Minisita se i...

**FOFOGA FETALAI:** Se i saunoa mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** O le mataupu lea, ona o le saunoaga a le Minisita i le vaega ia o auala. E taua tele ia le itu lea, ona e i ai nuu e fai si loloto lafulemu toe timu. Atonu o nuu na, e aoga tele ia le ta, e i ai foi nuu i mea ia o auala galue. E i ai foi nuu e lelei ia le taotoga i le tulaga foi lea i le gaoa, e faigofie ai ona fai ia le faiga lea e taugofie. E le tau faataina. E i ai le auala faapena na ou alu ai e asi ona o le savali mai faapitoa ou te vaai i ai. Na ou alu lea ou tilotilo i ai i le faata, toetiiti atoa le 2 maila o ou alu i uta, o le matua lelei o le auala ae sosolo ai i totonu le fue. E matua lelei, ae e leai lava ma ni faatoaga.

O le taua lea o le fautuaga lea ua aumai, e taua tele le vaai o auala, ma nuu ia e faaoga lelei ia galuega nei. O le a ou le taua atua leaga o lena e saofai mai i ina le sui na mana mai, a ou alu ou tilotilo atu, e oo atu lava i tua ane o le falesa, e na o mautofu mautofu le mea la e ola ai. Ia na ou faapea ana ou i i, e togafai misiluki uma mea ia e aai ai nisi e leai ia ni o latou faatoaga.

O le itu lona lua lau Afioga i le Fofoga Fetalai, o le itu lea o le CSO, Community Service Obligation. A tau mea na e malamalama mai ai tagata. O fesoasoani ia e ave i ai latou e le lava le seleni. E taua tele la ia le vaega lea, na ou alu i le isi talosaga, ae ou alu atu, ou fesili i le aiga, e le lava ia le latou seleni e faatu ai ia le latou pou. O lea la e i ai ia le fono lea, e talanoa ai ia talosaga faapenei e taua tele le itu lea, ae o lea e foliga mai, ae o le popolega, e le o lava le vaega lea e fesoasoani mo aiga ia.

O le itu i le tatou eletise, e i ai isi o lea ua saunoa le sa avea ma Minisita, o le eletise e pito sili lea ona taugofie o tatou vai. Ae i ai foi la ia le technology le tekonoosi lea ua i ai nei, e sili atu ona taugofie mo mea o vai foi ia e le o ni vai tetele e faatusa i o i Afulilo. E sili atu ona taugofie e tai pei o Fulusou la e faagasolo, o lo o faagasolo masalo toetiiti ona maea, o le tasi lena o vaega e maua mai ai le eletise e pito taugofie. Ae faapena foi ma le eletise e maua mai i le la, e matua manaomia.

Ae o le vaega faaiu la, o le tatou nonogatupe lea mai i o i le OPEC e faatetele ai ia tatou tane teu suauu. O le tasi lea mea afai e lava ma tele ia tatou tane, e taugofie foi ia le suauu i le tulaga foi lea e tasi lava le uta e sau e le sau soo, ae lava ia le suauu e teu, o lo o lava foi le tekonoosi i aso nei mo le puipuiga mai i se tulaga o se mu. Ae o le lelei o le itu lea, e faigata ona alu alu sioti tatou, i le feosofaiga i le tau o le eletise lea ua i ai i le taimi nei leaga ua malosi tele ia le vaega lea e maua mai le eletise i le taofiga ma oso ai i luga le tau.

O le taua la faagaioi o le tatou tankfarm lea po o isi a tatou tane fou ia, e umi ai le vaivaa. E tasi lava le uta suauu, ae lava ai tatou i ni masina se fia, ae o lea foi ua maua ua tele ina utu mai i inei ia vaa ia fagota. O le tasi lena

tupe maua o le atunuu e faaaoga i ai ia le suauu. Na ona tuualalo, o le tuualalo i lau Afioga i le Minisita.

**FOFOGA FETALAI:** Faafetai, malo faafetai o lena ua maua tuualalo mo le Minisita.

**Tofa Lealailepule Rimoni Aiafi:** Lau Afioga i le Fofoga o le Fono...

**FOFOGA FETALAI:** Ia, pe se mataupu sa laga e lau Afioga i le sui usufono mamalu?

**Tofa Lealailepule Rimoni Aiafi:** Leaga o au sa lauga tonu lava i le vaega o le 20% lea.

**FOFOGA FETALAI:** Ia saunoa...

**Tofa Lealailepule Rimoni Aiafi:** O le fautuaga, o tatou lava ia polokiki, e tatou te mananao lava pe 20%, 30% pe 40% e pauu uma ai lava mea uma. O le tatou lava lea faanaunautaiga, peitai, e tatou te fuafua foi i le Matagaluega ma latou mea fai. O lea sa avatu ai le fautuaga, o le process masani lava o le consultation. Po o le a se tala mai a le Matagaluega pe affordable, pe mafai lea mea ua tele tele.

O le isi mea, pe tutusa la o tagata uma lava commercial rates, domestic, manatua oe afai e \$100 lau pili i le masina, ia pe na o le \$10 lau... pe \$20 le a... afai e \$1,000 lau pili, ia e \$200 le... ona e fuafua lava i le faaaoga aua pe tutusa uma tagata tatau ma le 20% ia pe ave sao i tagata o fia maua se fesoasoani, ma le faaaloalo lava.

**FOFOGA FETALAI:** Faafetai o lea ua maua le fautuaga. Ia saunoa mai lau Afioga i le Minisita.

**Tofa Mauu Siaosi Puepuemai:** Lau Afioga i le Fofoga Fetalai, e fia maua se avanoa.

**FOFOGA FETALAI:** O se mataupu na e laga le sui usufono...

**Tofa Mauu Siaosi Puepuemai:** Ia o lea lava lau Afioga i le Fofoga Fetalai...

**FOFOGA FETALAI:** Saunoa lau Afioga i le sui usufono mamalu o le Vaa o Fonoti.

**Tofa Mauu Siaosi Puepuemai:** Ia e le faalavelaveina ia le saunoaga a le Afioga i le Minisita, talu ai ona o lea e le i mamao ese ma tulaga tau auala, o le ala lea o le tulai atu. E avatu foi se faamanatu, mo le silafia lau Afioga faasao mai lou sui usufono. Masalo a outou silasila i itumalo uma o Samoa, masalo e taitasi tailua auala galue a le itumalo ae ua maea foi ona faataina.

Ae o le itumalo lenei o Fagaloa, leai ma se auala galue, o auala lava ia a le Malo, lea lava e fai ma auala galue. O le ala lea e avatu ai le tuualalo i lau Afioga i le Minisita, ia pe le aumaia se vaega tupe mai i auala galue, ia faaopoopo ma se alagatupe i auala ia a le Malo, ia faamuamua ai loa ia auala o Fagaloa. Ia ma le faaaloalo.

**FOFOGA FETALAI:** Ia malo faafetai. Saunoa mai lau Afioga i le Minisita.

**Afioga Hon OLO FITI AFOA VAAI:** Faafetai, ia faafetai atu i faauilavea, masalo pe e te le i lagona mai ia lau faamatalaga na fai atu i auala. E le mafai ona ou tali atu i i leaga ou te pepelo atu ai ia te oe. Ae se i ou alu muamua lava se i ou vaai. Pe moni foi lau saunoaga pe leai, ia ona fua lea i ai o le ta auala i tua i lo tatou itumalo.

O le tulaga e pei ona fesiligia e Leala, ia Leala, e o faatasi uma lava ia tagata uma ma kamupani. O la foi ua uma ona ou faamatala atu le tulaga e lelei pei e stimulate ai foi le mea. E faapena auga o le mea.

**Tofa Lealailepule Rimoni Aiafi:** Lau Afioga i le Fofoga o le Fono, faafetai e sao, manaia le finagalo. A tatou aveese le \$20 miliona lea a le EPC i le tausaga, e tusa ma le \$26 miliona le 20% pasene lea. E \$26 miliona pe a faatusatusa i lata tupe na maua i le tausaga lea na tea nei i mea tau tariff i le rate. Ia ae faafetai o lea e lototele ia le Minisita, ia e na ona faamanatu i te i ua alu alu oe ae tupu mai se faalavelave, tele le tupe lea o le a pau, \$26 miliona ma le faaaloalo lava.

**FOFOGA FETALAI:** Ia, fai lava le tala foi lea, tatou o i ai, fai fai lava lelei. Saunoa lau Afioga i le Minisita.

**Afioga Hon OLO FITI AFOA VAAI:** Lau Afioga e ese le fai atu loa nei tupu nei. A lea na ou fai atu, masalo po o le lua, tolu tausaga ua toe oo mai lava ia le tupe na i ai pe a tulaga o le increase o le demand, ma le faaaogaina o le eletise. E fai lava si mamao o le mea lea ou te tilotilo i ai Leala.

Ia lau Afioga ia Tapunuu....

**Afioga Hon Leota Laki Lamositele:** Faamolemole i lau Afioga pe maua se avanoa...

**FOFOGA FETALAI:** Oi, ia tulai mai lau Afioga i le Minisita o Tina ma Tamaitai ma Agafesootai.

**Afioga Hon Leota Laki Lamositele:** Leai ou te tulai atu ma le agaga faaaloalo leaga sa saunoa nisi o sui usufono e uiga i vaitafe o Savaii lea e le o faaaogaina. Ou te talitonu o le matou itumalo lea e faasaga mai ai ia le faamatalaga. Masalo lava o le vai lea i Sili.

Ia ou te talitonu foi, ua i ai foi ia taumafaiga a lo tatou Malo sa taumafai ai i le taimi ua fano ina ia faia le atinae lea o le eletise i le vai lea, ia ae e fai lava ia le finagalo o le nuu. Ia o lea ua maua atu ia lou finagalo, ia o le a faapena foi ona... aua e muamua lava ona soalaupule ma toeaiina la e faalogologo mai, ia ona iloa lea po o le a le tonu. E pau lava le mea e mautinoa lea o le a faaoga i ai, o le faatauina o le vai lea o le a faaaogaina ai se vaega o le matou seleni.

Ae o le isi la mea e fia fesoasoani atu ai i le mataupu lea EPC, ona o lea ou te faitau atu i le Tala o le Tupe a le Faalapotopotoga i le faaiuga o Iuni i le 30 Iuni 2020, o lea ou te vaai atu ai i i, ia latou aseta o le taimi nei, current assets e \$98 miliona. A aveese ai ia oloa ia e \$19 miliona, e tusa e \$80 miliona le aofai o aseta i le taimi lenei o la e mafai ona faaliutupe. Mai i le \$80 miliona lena, e \$49 miliona mo mea o tupe e teu faavaitaimi. O le uiga o lau tala, o le matua tele lava o le tupe lea e i totonu o le EPC.

O lona uiga, a faapau le tau o le eletise, e le o ila ai ia le faatulugaga o le tau o le... pe a faapea e tuu i le lipoti lea e aumai. A faapea foi i le malosi lea ua i ai le EPC, e tataua ona i ai se latou mea foi o le Social Obligation pe a tuu i ai i totonu, e le tau avatua se isi tupe a le Malo pe a faapea o lea e lava ia le latou faasoa i le tulaga lea. E pei o lau fesoasoani atu lea ma le faaaloalo.

**FOFOGA FETALAI:** Ia atonu o lea ua fesoasoani mai ia le Minisita o Tina ma Tamaitai.

**Afioga Lupematasila Galumalemana Tologata Togia Tile Leia:** Lau Afioga i le Fofoga Fetalai, pe maua se avanoa...

**FOFOGA FETALAI:** Ia, o lea e tau fua atu ia le tatou galuega. O lea ua maea ona faaali lou finagalo i mea tau eletise, ia o lea foi ua faafofoga atu le Minisita. Ia vagana se isi mea e ese mai, ma faapupu mai ia tatou faauilavea, ia ona o lea e tau tuli ia le tatou galuega.

**Afioga Lupematasila Galumalemana Tologata Togia Tile Leia:** Faafetai, o le a faapupu atu. E pau lava si fesoasoani atu, e faafetai i le Afioga i le Minisita o lea ua saunoa manino i le tulaga i le atinaeina ma le faaaogaina i le afioaga o Sili. Ae pau lava o le avanoa taua foi lea e tau

faamalamalama atu ai, o le gaosiaina o le eletise e faaoga ai le suavai, e le inuina pe consume e le afi ia le suavai.

E na ona sau lava faataavale le peapea toe alu i fafo, ia e mafai lava ona fai uma ia atinae na e lua i le taimi e tasi. O le gaosi o le eletise ma le faatau o le suavai. Ia ma le tulaga lona lua, ia faafetai o tupe lena sa ou faaputuina mo le EPC, ia o lea foi e i ai mo Performance Indicators e seki mo Faalapotopotoga, o lo o tuuina atu foi i le Malo mo dividends, o tulaga na o lo o fesoasoani atu ai ia Faalapotopotoga Tumaoti, i le faatupeina o le Tala o le Tupe lea e tatou te lauililiuina i le aso, ma le faaaloalo.

**FOFOGA FETALAI:** Malo, ia faafetai. Ia tulai maia lau Afioga i le Minisita e faaauau, o lea ua uma mea tau eletise. Ia...

**Tofa Hon OLO FITI AFOA VAAI:** Ua matua ova le lua faalavelave, e tau talitali atu tulaga ia i le CSO lea e tau faapulapula atu. Ia e moni, o le CSO e faaoga foi e o limavaivai e le gafatia le tulaga o nisi o auunaga. E 15 tausaga o ou talosaga o le CSO e alofa mai ua o ta le gafatia le tosoina o lata moli, e le maua. Leaga foi e pule ai lava le Minisita. E pule lava le Minisita a faapea e fafia ia ai faaoga i ai le CSO. O le ma la lena o lea e taumafai e taofi atu...

**Afioga Hon Tapunuu Niko Lee Hang:** Lau Afioga i le Fofoga Fetalai... pe maua se avanoa....

**Tofa Hon OLO FITI AFOA VAAI:** Lea la ua ave ua faaitiitia ma tuuina atu i le tupe lea e faaagaga i poloketi o le tatou atunuu, ina ia laugatasia uma ai ia tagata limavaiv ai. E le toe faia i i... ma le isi mea...

**Afioga Hon Tapunuu Niko Lee Hang:** pe maua se avanoa....

**FOFOGA FETALAI:** Malie lau Afioga i le Minisita

**Tofa Hon OLO FITI AFOA VAAI:** O le isi mea lau Afioga i le Fofoga Fetalai, o le 2017, sa i ai faiga faavae. Sa saunoa lelei lava ia le Afioga i le Minisita o Tupe lea ma se i mavae atu nei, e le toe aoga le faaogaina o mea lea...

**FOFOGA FETALAI:** Malie lau Afioga i le Minisita se i tuu atu le avanoa i le faauilavea a le sui usufono mamalu.

**Tofa Hon OLO FITI AFOA VAAI:** Ia sa ou i ai sa ou faalogologo atu i le Kapeneta i le Minisita o Tupe...



**Afioga Hon Tapunuu Niko Lee Hang:** Ia faafetai i lau Afioga i le Fofoga Fetalai...

**FOFOGA FETALAI:** Ia saunoa mai le sui usufono mamalu.

**Afioga Hon Tapunuu Niko Lee Hang:** Leai e na o se mea e fia faasao i le Afioga i le Minisita. E le pule le Minisita i mea ia, e pule ai le Komiti o na e te silafia. E i ai le Komiti a le Kapeneta e iloiloia ia talosaga. E le pule la le Minisita, seiloga e approve mai le komiti lea, ona faatoa faataunuu le o le galuega lea e te ...a faapea o lena ua e pule i le taimi lenei, oka oka e, leaga o lena ua ia oe le power. Ou te le faitio la i le tulaga lena, a o le ala o mea sa o matou ui mai ai, e i ai le komiti, e faaali finagalo pe talia lea galuega ma lea galuega. A o lau fautuaga e fia faasao...

**FOFOGA FETALAI:** O lea ua maua.

**Tofa Hon Olo Fiti Afoa Vaai:** Sa ou fesili i le komiti, ae fai mai e uma lava avatu i le Minisita

**Susuga Hon Tuilaepa Fatialofa Auelua Sailele Malielegaoui:** Se i maea ona avatu lea o nai vaega ia. O le komiti lea e taua e le Minisita, ou te le i manatua na i ai se talosaga na aumai teena. Talosaga aemaise lava moli tai tasi, tai lua, tai tolu. A ova atu loa ona fesiligia loa lea pe aisea ua tele ai. A o le mea lava masani o nuu, e aumai e toe fia maua sina faamatalaga. A o le tele lava o mea ia, aemaise aiga i tua, e manaomia ai le mamao o le auala, e ono manaomia ai le 2, 3 pou. O lea ou te manatua nei, e leai lava se talosaga na avatu. Ou te le i vaai foi i sau talosaga tusia. Seivagana la ua talanoa oulua, ae le i avatua i totonu o le komiti lea. A o moli ia taitasi tailua, o mea lava ia e otomeki lava le faiga. Vagana ua mamao tele i tua ua talosaga se isi 3, 4, 5 pou, o i ina la e tupu ai le fesili, ina ia manino lelei le tulaga lea. O le vaega lea lona lua. E i ai foi nonogatupe a le EPC, e ala ona ou taua le mea lea, i le va faa-Minisita, talanoa oulua i tua, ae le o lo outou tali mai ne i te i ua avatu mataupu iinei, e le lelei la i le vaai atu a le isi Minisita o faasao atu i inei ia ni mataupu. Ae talanoa oulua o Minisita i tua.

**FOFOGA FETALAI:** O lea foi e...na o si faamanatu atu lava i tatou sui e faauilavea. Leaga o le faauilavea e faapuupuu. E le faatagaina ai ni tatou saunoaga faalauaitete laititi atu. Saunoa mai le sui mamalu o Satupaitea.

**Tofa Hon Lautafi Fio Selafi Purcell:** O le lauga a Satupaitea e le iloa fai le ituaiga mea lena, o le taetaesolo. E alu sao a i le fatu. O lea ou te maua le saunoaga a le Minisita e le fiafia i le tele o ni faauilavea. A o le taimi o nofo atu i i, ia Olo, e 2 lava au upu tu ae Olo i luga fai mai le faauilavea. O lea la

ua e iloa e oe, e le manaia le faauilavea soo. O lea la ua e toe inua le vai sa e faia. Ou te le manao e toe faalavelavea atu i se taimi mulimuli.

Ae taua ia leaga o le mea lea sa ou tautala ai ananafi, i le sustainability o mea ia lea ou te tilotilo i ai. E na ona tuu atu lava i ina o manatu. E 20%...o lea ua faaalua atu e isi ou uso a sui usufono, o le mafai gafataulimaina o lenei pau tele, i le taumafai o le Matagaluega ia mafai ona oo atu le service i tua. E leai se mea o i ai i le taugofie o le eletise, e mananao uma ai lava tatou. A o le mafai la e le kamupani ona o atu e fai lou moli, pe a faaletonu. Aua o tupe la ia e totogi ai tupe ia o le a tipi ese, ae taatia atu i ina. O lona lua o le CSO foi, ou te faasaoa ona o au, ou te le komiti lea o le CSO. Ou te le i vaai lava i sou igoa i le 7 tausaga talu ai na ou.... Ae le iloa pe ese se igoa na e alu ai i lalo. Aua e o atu le EPC e fai le assessment. A fai la e le i aumaia lou suafa, o lona uiga e le manaomia e oe le CSO, o lona e tele au tupe, e fai ai lou moli. Ae ave i nai tagata limavaivai.

O auala galue, leaga o lea ua ou faalogo atu i te i ua.... O lau saunoaga, Olo, o lea o le a outou toe tilotilo i le polokalameina o auala galue. O lau talosaga o lea e fia fai atu, ona i ai nai nuu ia, o le a oo lava i ai le faiga o le auala galue a le Afioga i le Minisita sa i ai muamua, o le a oo loa i ai. Ae taofi loa le paketi o le faiga o auala, ona o le suiga o le Malo. E i ai lou auala e lavea ai i i, i le vaega lea.

O lau fesili i lau Afioga, pe faaauau pea le aumai o auala na lea sa i luga lava, e tuu pea i luga o la outou polokalame, pe o le a toe seu atoa lava. Ona toe tilotilo lea i le assessment, ae ua uma foi ona asses muamua. O le auala lea o si ou nuu o Vaega, toetiti lava oo i ai le faasologa, ae sui loa le Malo. O le saunoaga foi a lau afioga, tou te o i ai e silasila i ai, o nuu lava e leai ni latou faatoaga, e leai se auala e faia. E silafia foil au afioga, e ala ona le lelei ia faatoaga a nai nisi nuu, ona e le o lelei le auala e oo ai ia latou faatoaga. Na ona tuu atu lava i ou autafa o se fautuaga. O au ou te faifaatoaga, ou te alu lava i lau faatoaga i aso uma, pe a ou oo atu i Savaii.

**Tofa Hon OLO FITI AFOA VAAI:** Faafetai mo fautuaga, ae o le tele ia o auala sa ou tilotilo i ai. E tai lima kilometer e alu i ai, e leai lava ma ni faatoaga, o le upu moni lava lena. Ae faata atu lava i tai e tau i uta. E pau lava mea e i ai, na o le papovi la e i ai. O le mea la lena ua matua ou tilotilo totoa lava i ai, e ave le faamuamua i auala i mea o lo o papaaaai ai le mamalu o le atunuu.

O le tulaga foi i lou auala, e le o au na taofia, na taofi e Tapunuu, o le mea sao lena. Ae o lea se i ou mafaufau i ai pe fai pe leai. Aua o lea ua e fesiligia pe o le a faaauau.

**Afioga Hon Tapunuu Niko Lee Hang:** Lau afioga i le Fofoga Fetalai, i se avanoa faamolemole ona o lea ua taua le suafa o Tapunuu.

**FOFOGA FETALAI:** Ia faapuupuu mai.

**Afioga Hon Tapunuu Niko Lee Hang:** Lau Afioga ua e silasila mai ua faalua ona tuuaia au e le Minisita, ae le faamaonia tuuaiga. Ou te le i taofia se auala, o ia lea ua sau taofi. A o le auala na ou pasia e fai. Se soia. na e faaleaga foi lou matai ananafi, a o lea foi ua atili ai lou faaleaga. O le tuuaifua ia faamanuia e le Atua.

**FOFOGA FETALAI:** Se i saunoa maia, soia ia e te toe taua le suafa o Tapunuu ma le umi o la tatou mataupu.

**Tofa Hon OLO FITI AFOA VAAI:** Amen. Ae manaia lau soesa. O le tulaga lau afioga i le Fofoga Fetalai, i le atinae ia i Alaoa, a le EPC o lea e agai atu i ai le tulaga lea. O se tasi foi o vaega o le tatou Hydro. E le gata i lena, a faasaoia ai tulaga o suavai mo le fofoga taumafa o le atunuu. O se atinae taua foi i lau tilotilo. Ae o lo o faagasolo pea tualumaga foi o nisi o mea e faataunuu, ona faasolo loa lea o le tatou galuega lena.

O le tulaga i uafu, le uafu lea i Asau lau Afioga i le Fofoga Fetalai, o la ua amatamea atu i ai...

**FOFOGA FETALAI:** Malie lau Afioga i le Minisita, se i tulai mai le tama matua ia Ale.

**Tofa Ale Vena Ale (Faleata 4):** Lau Afioga i le Fofoga Fetalai, faafetai tele i le faautautaga totoa a lau afioga, i le tuuavanoa mai pea, i le taumafai atu a lenei itu. Aemaise o le matou itumalo nei faatoa pale mai. Ona o lea o le a see ese le saunoaga a le Afioga i le Minisita i nisi foi o mataupu sa laga. Ae faafetai o lea ua oo mai lou finagalo e tusa ai ma aualagalua. E pei ona e silafia, o lea foi sa taua i lau lauga faalauaitete ia auala foi i totonu o si ou itumalo. Aemaise le afioaga i Saina ma Toamua ma totonu i le Leusoalii ma Puipaa. Ae lafo atu pea i lou fiangalo e te silasila i ai. A oo i se taimi e te afio atu e te vaavaai i ai, ona faailo atu lea, ta o e faailoa atu i lau afioga. Ae o le mataupu lea sa ou laga i mea tau eletise, faamolemole e te silasila i ai lau afioga.

Ona ua toatele foi nisi o le itumalo, i mea ia o smart meter. E toe silasila i ai, ua complain i smart meter, se i silasila i ai, aua o oe na e nafa ma le Matagaluega a le EPC. Ia manuia ou faiva faafetai.

**Tofa Hon OLO FITI AFOA VAAI:** Faafetai, e ui lava ina avatu sau faamatalaga i se taimi ua sola lau afioga i le sui mamalu, ta te sosoo tulutulu, e muamua lava ou asiasi atu i ou auala, ma tulaga faapena.

O le tulaga foi i smart meter, o lea foi sa avatu ai si na au faamatalaga, ae i ai lava le tulaga e le mautonu ma talitonu le mamalu o le atunuu i lea foi

atinae. Ae pei ona ou fai atu, o au lava na amata ona ou tetee i ai, ona o lou le malamalama, i le tulaga sa i ai le faaaogaina foi o lea atinae.

E tatalo atu ai ma le agaga faaaloalo le mamalu e o lo tatou atunuu, a uma loa ona faasolo le tatou atinae lea, o lea ua outou faafofoga mai ua faapau atu le eletise. Ae lagolago mai le galuega foi a le matagaluega e pei ona taumafai i ai le faapipiiga o tatou meter.

O le uafu lea i Asau e faapuupuu atu sau faamatalaga, o lea ua avatu i ai tulaga o le marina lea sa i tai, o la se i tau amata ai ia se faiga e toa mai ai vaafaila i Asau, i le amatamea atu i le taimi lenei. Sa i ai le faamoemoe o lo tatou Malo sa i ai, i tulaga o faleia ma mea faapena. E na o le pau lena o vaega e ave i ai le faamuamua, e tilotilo agai i ai, ona o le mafai ona ofi atu i totonu o le ava i Asau. Ae o tulaga i le tau faaloloto ma tulaga faapena, o le vaai mamao lena o lo o i ai le tatou Faigamalo i le tulaga o le faaaogaina o le uafu i Asau. E faapena foi i le tulaga o uafu ia i tatou motu laiti o Manono ma Apolima.

O lena ua i totonu o le Tala o le tupe lau afioga le sui Fofoga Fetalai, faapea foi le faafogafoga mai o le tatou motu. O le a i ai le tulaga o le toe faaleleia o tatou uafu aua le feafioai o le mamalu o le atunuu i tatou motu laiti na.

**Susuga Hon Tuilaepa Fatialofa Auelua Sailele Malielegaoui:** Lau Afioga i le fofoga Fetalai, o le uafu lea i Asau po o le ava lea i Asau, o le mea pitosili ona taua, o le ava ina ia talepe le ava, ia ofi atu vaa i totonu. O le ava lava ia e loloto, a o le faafitauli lea e tupu, e tele le faaletonu o le ofi atu o le vaa i totonu ona e le o se ava faale-natura. Sa tui i fanaia i le 1970, e le ila i fanaia, o lea la na ala ai ona taofi. A o lea la ua i ai le tekonoosi i le vaitaimi lenei, ma le kamupani tonu lea e faia le atinae tele lea o le Chinese Harbour, lea e galue nei i le uafu i Matautu. O le kamupani lena o lea ua i ai tekonoosi. E le faaaogaina ni fanaia, ae ati, e suati e masina. A le faia le mea lena, e oo lava i le faavavau e le mafai ona faaoga Asau i le tulaga, e tataua ona faaoga i ai. Ma e ono tupu tele ai le atinae o Savaii i le itu i Sisifo. E taua tele le ava, o le ava e taua, ae o totonu o le loloto, e loloto lava ia le loto i Asau. A o le sau i totonu o vaa, o le faafitauli lena. E mafai ona tupu ae le itu atu le la i Sisifo pe a talepe le ava, ia mafai ona sao atuni vaa tetele i totonu, aemaise o meli ia faapea foi ma vaaoloa, ma vaafagota. O le itu taua la i le itu atu la i Asau.

**Afioga Hon Tapunuu Niko Lee Hang:** Lau Afioga i le Fofoga Fetalai:

**FOFOGA FETALAI:** Se mea faasao pe se mea faamalamalama.

**Afioga Hon Tapunuu Niko Lee Hang:** O lea ua oo tonu lava le saunoaga a le Minisita i uafu ia i Manono ma Apolima. Faamalo e pei ona e silafia o le uafu o Manono ua uma tai ma uta. Sa ou faapea e te valaaulia au, ta te o

atu e tatala le faatalivaa lea i Manono, aua o le galuega sa amata e au ae faaiu e oe. Sa tatau la ona ta toa lua i o. Ae le afaina lea mea. O le uafu lea i Apolima, o la ou te matauina i le Tala o le tupe, e na o le \$250,000 ae mo uafu e 2. E na ona fautua atu e silasila pe lava lea tupe. O Apolima foi e fai lava si faigata ona o le tulaga o le au lea e alu i totonu e faafaigata ona o ai le mamalu o le atunuu, o lo o afifio ma papaaao ai. O lau tuualalo toe silasila po o ua lava lea tupe. Faafetai.

**FOFOGA FETALAI:** Tulai mai le sui usufono mo Aiga i le Tai.

**Afioga Auuapaau Mulipola Aloitafua (Aiga i le Tai):** E leai se agaga i lou sui usufono e faalavelavea le saunoaga a le Minisita, ua alofa atu foi i lau Afioga i le Fofoga Fetalai, ona ua tele le faauilavea i lenei aso. Aemaise lava o le mataupu lea. Ae o le a faamama atu le mataupu. Ona o le mataupu lenei sa ou lauga ai i totonu o le Maota lenei, i le amataga o le Paeaiga lenei. O le mataupu lea e uiga i uafu, uafu ia i lou motu i Manono tai, ma lou motu le i Apolima tai. O le \$250,000, o lea ou te tilotilo atu, o lo o i ai le faaupuga lea faapea o le iloiloga, o le faatinoga o le poloketi lea. Ae ua maua i le tele o finagalo e pei foi ona tulai mai le sa avea ma Minisita o Galuega i na vaitaimi i le Faigamalo ua tuanai. Masalo e sili lou malamalama aua o au e ona motu ia e 2.

Ne i lilifa i le faaupuga lea o uafu ona tatou manatu lea na o le uafu lea i uta i Manono uta, ma le uafu lea i Apolima tai. O le uafu i Apolima tai sa alu i ai lau asiasiga ae le i faia le palota, ua leai se uafu. O le upu moni lava ua leai se uafu. A o lau vaai i ai e tatau ona i ai se uafu malosia e tasi, i Apolima tai. E fai si soua o le gataifale i i, e faigata ona ofi le vaa i totonu o le ava, leaga e leai se uafu i le taimi lenei. E leaga o au lava sa tu ai, ma fai i ai lau galuega o le research, ae le i faia le faiga palota. A o le uafu la e i Manono tai, faamolemole, ia lau Afioga i le Minisita, e na ona tuualalo atu, e le gata i le uafu ae o le motu, e pei lava foi o Upolu nei, a e fia oo i lou aiga, e toso le logo ina ia fetau ma lou maota. O Manono e tofu lava aiga ma uafu. A leai e tai 4 aiga e faasoaina le uafu. Ne i lilifa la i le uafu lea i Manono uta, ae faamolemole alu Afioga i le Minisita, e manaomia foi le galuegaina o tamai uafu ia, aua le mamalu o le aufaigaluega a le Atua o lo o galulue ai, ma le lautele o le motu.

O le faamaninoga lea ma le faaaloalo lava.

**FOFOGA FETALAI:** O lea ua maua atu.

**Afioga Hon Tapunuu Niko Lee Hang:** Faamolemole lau afioga i le Fofoga Fetalai.

**FOFOGA FETALAI:** Ua tele lava au faauilavea ae taamilomilo lava i le mea e tasi.

**Afioga Hon Tapunuu Niko Lee Hang:** E leai lau afioga, ona o lea e taua e le sui usufono o au le Minisita, lea e faapea e leai sou malamalama i galuega ia. Fia mai o ia e alala i Manono ma Apolima. E le nofo i Apolima e nofo i Manono uta. Ae ou te le iloa la. O lea na fai le uafu i Manono uta, o la ua fiafia le afioaga ua amatamea le Malo, o la na faatali le faiga o le uafu, e faatino la e Olo. A o Apolima tai, o lea e taatia lau fautuaga ia..a o lea e faamatala mai e le sui usufono lea. E na o mea o tapenaga le \$250,000. Se i toe silasila, aua a alu atu lava le tapenaga faatino le galuega. E masalo o le isi Tala o le tupe. Malo faafetai.

**Afioga Auuapaau Mulipola Aloitafua:** Lau Afioga i le Fofoga Fetalai, e leai e le gagavale le sui usufono e tus o le saunoaga. E pau lava lea o le faamanatu, leaga ne i lilifa i le uafu lea e i Manono uta, faafetai.

Afai ua amatamea lau Afioga, ae o le motu e pei ona ou fai atu, e i ai tamai uafu laiti. A tau le uafu o Manono ma le gagana o le faaaogaina o le uafu, e pei lava o auala galue i nai isi itumalo. O le uiga lea o le faamatalaga, ae o le galuega, e leai e le tau selu atu i le galuega. A le faamaninoga leaga o Manono, e ova ma le 20 tamai uafu la e i ai i Manono. A alu atu la le faifeau, e tatau la ona afe le vaa i lumafale o le faifeau. Ae faamalulu atu, e sili lou malamalama i lou motu, nai lo lau afioga. Faafetai.

**Afioga Niuava Eti L Malolo (Vaisigano 1):** Lau Afioga i le Fofoga Fetalai, e faamalulu atu leaga o lea e pisa ia sui mamalu aemaise o le Minisita i luma o lumafale o lenei aiga i Asau, a o lea e nofonono le usugafono a lenei foi itumalo. Ae faafetai foi i le Taitai o le Itu Agai, o lea ua toe laga mai le mea lea i le uafu o Asau. O le mea ua leva ona tatau ona fai ae le faia. O le agaga faafetai lea, o faalogologo mai foi si ou itumalo. Ae faafetai foi i le Minisita o lea ua faataoto le vaega lea, e toe faatino ai le uafu lea i Asau. E aoga foi e toe avatu ai tane tetele ia sa teu ai le penisini ma le kiso, e tusa ma le motu i Salafai. Ae tufa lava ia Upolu nei, i tane o lo o i inei, ma le faaaloalo.

**FOFOGA FETALAI:** Faafetai i le sui usufono mo Vaisigano.

**Tofa Hon OLO FITI AFOA VAAI:** O le agaga faafetai e momoli atu i le paia ma le Maota. Aua foi la outou faasoa, ae tainane foi o lo outou fautua mai, e taumafai ai foi se auaunaga a lou nei foi sui faatauva.

Le paia e o si ou itumalo, i Samoa nei ma atunuu i fafo...

**Tofa Hon Tuuu Anasii (Siumu):** Lau Afioga i le Fofoga Fetalai, mo sina avanoa faamolemole lava.

**FOFOGA FETALAI:** Le sui usufono mamalu mai Siumu, o lea ua tau faaiuiu mai le saunoaga.

**Tofa Hon Tuuu Anasii:** E leai si na tamai mea lava lea. O lea o le a maea le saunoaga a le sui usufono, e le i taua maia le talosaga i le aualasima lea ou talosagaina. Afai ua galo, ia faamanatu atu, ae faamanatu foi le aualagalua o lou itumalo. Ma le faaaloalo.

**FOFOGA FETALAI:** O lea ua faamau uma lava e Olo ia mea na.

**Tofa Hon OLO FITI AFOA VAAI:** E leai se vaipanoa o saunoaga e le o faamaua. O vaisima, o vailaupapa, o mea uma lava, ua faamaumau uma i lalo.

Le paia e o lo tatou itumalo, le paia lava lea i le afio o Matautia, afifio foi ia aiga Samoeleoi, afio oe le Lilomaiava, afifio foi oe le Matua ma le Maopu, tainane foi le afifio o le alalamaota. Alalatai lo oulua sa seelua o Sela ma Oloolelotofaamaoni, o le alofa, mea uma lava.

Le tapuaiga a le Taupoloalii ia Saletogia ma Sautuvai ma le mamalu i le alataua.

Le aufaigaluega paia a le Atua o lo o faafalelemalu i si o tatou itumalo. Susu foi lau susuga i le sea, lau susuga Maanaima ma le faletua, faapea foi le paia o le augalulue ma le aufaigaluega paia a so o se ekalesia.

Ua faamalo le folau, faafetai atu foi ia outou talosaga ma outou tapuaiga. Ma le toe filifili mai o au nei. Ua ou toe pale ai i la outou tofi, ae ua outou titi ai i le tofi Minisita, e pei ona ua i outou aao nei.

E faafetai atu i lau Afioga i le Palemia, i lou amanaia foi o lenei itumalo vaivai, i lau tofiga ua matou pale ai.

E faafetai faapitoa i nai ou aiga, i la outou lagolago, ua mafai ai ona ou faatino ma taunuu ai lou faamoemoe i le manuia, viia le Alii.

O lau faafetai faapitoa i Faauluuluga o Faalapotopotoga o lo o matou galulue faatasi, e faapea foi le Matagaluega i la outou lagolago i le taimi lava na ou taunuu atu ai. E lagona lava le fiafia i la outou lagolago mai i lau galuega. O le upu moni lava, e faatino lava outou, o lena foi ua tatala lo outou tomai ma lo outou agavaa, e faatino ai le atinaeina o le tatou galuega, ma toe siitia ai atinae ma galuega e pei ona i ai la tatou Malo i le taimi nei.

Ia agalelei le Atua i lau Afioga i le Fofoga Fetalai, faapea le mamalu o le tatou Palemene. Ia soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le Saunoaga Talifuaitau a le Minisita mo Galuega, Felauaiga ma Atinae Eseese.*

**FOFOGA FETALAI:** Ua faamalo saunoa i lau Afioga i le Minisita. E talitonu foi o logona foi i le Maota saunoaga ma faamalamalama o nisi o mea sa laga e sui mamalu. E talitonu o lea ua faamaumau e lau Afioga ia manaoga foi o sui taitasi, aua foi o latou itumalo, ia malo faafetai. O lea ua manino lea tulaga aua le agai i luma o lo tatou atunuu. Malo saunoa.

E talu ai o lea ua tatou taunuu i le taimi o le tatou malologa, o lea ua maea tapena la tatou taumafataga o le aoauli, aua le taligasua ma le tauteaga a le paia o le Palemene.

Ae i ai sina faasilasilaga lea e fia tuuina atu.

E faasilasila atu foi mo le silafia e le Maota, o lo o i ai se auaunaga o le Pulega o Tineimu ma Faalavelave FESA, i tua atu o lo tatou Maota nei, siaki ai lou toto ma lou suka. Atonu e tau foi lea e maua ai avanoa e siaki ai le tulaga i le toto ma le suka a outou afioga. A o le i taliina le sua o le aoauli. E faafetai ai foi i lea auaunaga o lo o mafai ona lagolagosua i le mataituina o le soifua maloloina o a outou afioga.

O le mea lea, o lea ua i tua i i, lea auaunaga taua mo i tatou uma.

Ou te faasilasila atu ua faataatiaese nei Taulumaga o le Fono Aoao Faitulafono, mo lana ma lana malologa i le aoauli seia toe tau aofia i le itula e 2:00 i le aoauli.

*Na faataatiaese Taulumaga a le Fono Aoao Faitulafono i le itula e 1:45 i le afiafi.*